

Korint Kimbi 2

Polnönj Korint yengöra kimbi aliga 2 ahök.

Jim-asa-asari

Pol aka Korint urumelenj könagesö yenjön urumohot ölöpnj qahö aketka nalö miangörenj Polnönj Masedonia mala kimbiñi ki ohoyök. Tosatñan Pol tuarenjonj köhöikñi ak wangigetmö, Polnönj töndup angururuk memba et ala yembuk urumohot akingö kapanj kölöc. Angururukñini tekömapkö urusösöñgajñi kondel enjgiyök.

Kimbi bahöñi mutukñi (Boñ 1-7) miangörenj Polnönj Korint urumelenj könagesö yembuk jöhöjöhö ahöhanjö keunji jiza. Könañi denöwögöra urumelenj könagesö mi köhöikñanök jim enjgiyök? Mewö aiga urunini melenja urumohot akeri, miangö sösoñgajñi kondela jim asariza.

Kimbi bahöñi 2 (Boñ 8-9) miangörenj Judia urumelenj könagesö bauköm enjgiba naluk enjgimegöra kuñgum enjgiza.

Kimbi bahöñi 3 (Boñ 10-13) miangö keunji kewö: Böhi takapulakanj tosatñan nanñini getñini 'Aposol ölnj' jiba Polgöra aposol munenji jigetka Polnönj keu miangö likepnj melenj enjgiyök.

Buk kianjö bahöñi bohonñi 5 mi kewö:

Jim-asa-asari keu *1.1-11*

Pol aka Korint urumelenj könagesö *1.12-7.16*

Judia urumelenj kambu yengöra naluk alme *8.1-9.15*

Polnön aposol ölnji akzawanğö kukösumñji 10.1-13.10
Keu teteköñji 13.11-13

¹ *Anutunönj sihimñanğö dop Pol ni kunğum niñgiiga Kraist Jisösgö melaimelai azi aposol akzal. Nönön urumelen alanini Timotibuk tatzit. Korint sitinönj Anutugö urumelen könagesö maljei aka ambazip sarakñji pakpak Akaia prowinsñini dop köla maljei, netkön embuk Buña keu eraum mötpingöra kaba kimbi ki ohozit.

² Anutu Iwinini aka Kembu Jisös Kraist yetkön mönö kalem möriam enğiyohotka luainönj malme.

Polnönj Anutu urukölalepñanğöra möpöseiza.

³ Nini Kembunini Jisös Kraistkö Anutu Iwinji möpöseimakzin. Yanğön mönö ak-kömükömu Tonji aka urukölalep pakpak neñgimakzawanğö Anutuñji akza.

⁴ Nini kahasililinj könañji könañji miwikñaimakzini, nalö miangörenj Anutunönj uruqesawölim neñgimakza. Uruqesawölim neñgii möta miangö qakñe kininga tosatñan kahasililinj könañji könañji miwikñaimakzei, mi mönö ölop amqeba uruqesawölim enğimakin. ⁵ Miangö könañji kewö: Kraistpuk qekötahöinga yanğö sihimbölönjan qaknine öngöi kelenmalelenj mörakzinmö, miangö dop uruqesawölim mewöñanök neñgii Kraist qekötahöinga urukölalepñan urunine geiga kelenmalelenj mörakzin.

⁶ Neñön köñjilinj uruñe maljin ewö, Anutunönj mönö inini uru qesawölim enğii uruñini kunbuk melenja oyaenkyoaen akñegöra mötza. Anutunönj

* 1:1: Apo 18.1

uru qesawölim neŋgiiga eŋön mi eka nanŋinak uru qesawölim miwikŋaime. Uru qesawölim eŋgimakzawaŋgö ölŋan mönö uruŋine kewö asuhumakza: Nini sihimbölö möringa eŋön tok sihimbölö miyöhök miwikŋaime ewö, mi mönö ölop möta mökösoŋda kin köhöiba malme. ⁷ Sihimbölönöŋ qakŋine öŋgöi mörakzei, uru kölalepnöŋ mönö mewöŋanök qakŋine öŋgöi malje, mötzin. Mi möta miangöra eŋön kin köhöimegöra mamböta jörömqöröm köhöikŋi ahakzin.

⁸ *O urumelen alaurupni, nini Eisia prowins uruŋe nup memba mala nupkö sihimbölö möta kahasililiŋ miwikŋaiba mörini, iŋini miangöra gukmaulem malbepuköra mötzin. Nupkö lömbötŋan ösumnini oŋgita öŋgöŋgöŋi aka mulumgöm neŋgiiga kin köhöibingö osiŋmö, töndup kapan kölinga mem et al neŋgiiga malin. Mewö asuhuiga toroqeba malbin me qahöwi, miangöra mewöyök tötböröm aka malin.

⁹ Mewö mala uruninan kewö mötmöriin: Kunöŋ kömumbingö keuŋi lök jim teköi keu miangön qakŋine öŋgöi ayuhubingö mambörin. Nanini ösumnöŋ nariba malbinbukmö, Anutu kukösum qakŋe nariba malbingöra aka mewö asuhuyök. Anutunöŋ kömukömuŋi mem gulim eŋgii wahötmei, yaŋön mönö amqeba nini mewöyök bauköm neŋgimakŋa.

¹⁰ Kömumbinbukö keŋgöt mötmöt öŋgöŋgöŋi ahinmö, Anutunöŋ mönö miangöreŋök meköm neŋgiyök. Meköm neŋgiyök aka toroqeba meköm neŋgimakŋa. Nini jörömqörömnini Anutugöreŋ ala mewö möt narim waŋgiba kinjin.

* 1:8: 1 Kor 15.32

11 İhini mewöyök baukôm neŋgiba neŋgöra aka köulukögetka mekôm neŋgimakŋa. Gwöt-pukŋan neŋgöra aka köulukögetka Anutunöŋ möta miangö likepŋi meleŋni kalem möriamŋan dop köl neŋgii neŋgehorimakŋa. Mewö mekôm neŋgiiga alaurup gwöt-pukŋan mi möta neŋgöra aka mindiriba möpöseigetka köiraŋ köulukŋinan öngöba Anutugö kezapŋe gemakŋa. Miangöra mönö toroqeba nöngöra aka Anutu köulukömakŋe. Mewö qesizal.

Polnöŋ köna anangö areŋi uteköyök.

12 Tosatŋi İhini nöngö könaŋamnaŋgöra uruyahöt akzei, miangöra keu kewö jimam: Anutunöŋ solanŋi malbingö mörakzawi, neŋön miangö dop gölmeŋi gölmeŋi liliköba miangöreŋ ahakmeme sarakŋi mi pöndaŋ wuatangöba malin. Engö sutŋine mi mönö kapan köla törörök wuatangöba malin. Mi gölme ambazip mötkutukutuninaŋgö dop qahöpmö, Anutugö kalem möriamŋan inahöm neŋgiyöhaŋgö dop mi aka memba malin. Anutunöŋ ahakmemeni mi eka naŋgöba “Dop kölja,” jiiga urukezapnan keu mi mörakzal aiga miangöra silenini memba öngömakzin.

13 Kulem ohomakzali, miangö keuŋi pakpak mönö ölop oyoŋda möt asarimeangö dop akza. Keuni mi geŋmoŋi qahö. Keu könaŋi asa-asambötŋi kun qahö ohomakzal. Mi aukŋeyök ahöza. Miangöra nöngö könani mi körek möt asarim tekömegöra möta jörömqöröm akzal. 14 Nöngö könani mi lök bahösapsap kewö möt asarize: Kembunini Jisösnöŋ kunbuk kamawi, nöŋön mönö nalö miangöreŋ engöra aka sileni memba öngömam. Miangö dop İhini mewöyök ölop nöngöra

aka silenini möpöseigetka dop kölma. Inini nöngö könani mewö möt asarim tekömegöra mötzal.

15 Nöñön keu mianğö qakņe awösamkakak kinalanğöra aka mutuk engörenj kaba engekņamgö arenji alal. Indimņi yahöt engekiga kötümötuet mötmegöra aka kōna anmamgö arenji kewö albi ahöyök: 16 *Masedonia prowinsnōņ anmamgö kōnanōņ mutuk inini engeka toroqeba Masedonia anda lilingōba kunbuk engörenj kamamgö jial. Kaba malbi yuai tosatņi baukōm niņgiba melaim niņgigetka engōmosōta Judia prowinsnōņ anmamgö mōral.

17 Areņni mewö albi ahöyökmō, mi utekōyal. Mewö aka an köl kam köl qakņe möndōba laņ qahō ahal. Nani areņni mi gōlme ambazipkō dop nananğöra laņ mötmōriba qahō ahal. Mewö kude mötmōrime. Numbu ösum mohot mianğōnōk “Oņ, ölop kamam!” aka “Qahō kamam!” keu yahöt mi mindiriba qahō jial. Mōnō ahakmeme sarakņi wuatangōmakzal.

18 Anutunōņ keu jiba mianğö dop pōndan ahakzawi, neņōn mōnō yanğō jeņe kewö jim köhöizin: Neņōn nalō kunōņ “Oņ, mi ölop akin,” jim jōhōba mianğö andōņe “Mi qahō akin,” pōtagororōņ keu mewö melenqelenj qahō jiba malin.

19 *Anutu Nahōnņanğö kōnaņi kewō: Nöñön Sailas aka Timoti yetpuk engō sutņine Kraist Jisōsgō kōnaņi jim asariba malinga yanğōn “Anutugō jitņi tem kölman!” aka “Qahō tem kölman!” keu jōl yahōtyahōtkō qakņe melenqelenđa qahō kaba malōkmō, Anutugōra keu

* 1:16: Apo 19.21 * 1:19: Apo 18.5

jiba jöhöyöhi, miangöra mönö “On!” jiba miangö dop aka memba malök.

²⁰ Anutunöŋ jöhöjöhö keu (promis) sehisehini dawik nenŋiyöhi, qötöŋini qahö mötzinmö, Kraistnöŋ keu körek miengöra “On!” jiba mem köhöiiga pöwöwöm ahöza. Miangöra Kraistnöŋ mewöyök nam köl nenŋii keu miengö ölninan asuhui möta “Keu mi ölna,” jibin. Mewö ahinga Anutugö qetbuŋaŋan sehimakŋa.

²¹ Anutu nanŋak mönö nini aka inini mohot mem köhöim nenŋiiga Kraistpuk qekötahöba kin köhöibin. Yaŋön mönö Buŋa keu jim sehibingöra aka bedu mem nenŋii maljin. ²² Anutunöŋ uru-nine Uŋa Töröŋi mekötahöiga yaŋön oyaenŋkoyaen malbingö keuŋi nanŋöba jim köhöimakza. Anutunöŋ mewö aka buŋaŋi akzinanŋö muŋgem supapŋi mi mekötahöm nenŋiyök.

²³ Nöŋön tembula lömböt enŋibileŋbuköra möta zilaŋ Korint enŋöreŋ qahö lilingöba kayal. Mewö jiba Anutugö qetŋi qetpi ölop keuni mi nanŋöba jima. ²⁴ Silik denöwö aka Anutu möt nari-makzei, miangöreŋ kembu ak enŋimangö qahö mötzal. Mötnariŋinan lök töndangöm enŋiiga kin köhöimakze. Miangöra sösöŋgai qakŋe malmegöra bauköm enŋimangö möta embuk mohotŋe urugö nup memakin. Mewö.

2

¹ Mutuk enŋöreŋ kaba siksauk akerangöra jim enŋibiga gamuŋini möta wösöbirik aket. Miangöra enŋöreŋ kabiga kunbuk mewö akepuköra möta urunan keu jöhöba köna anangö areŋni uteköyal.

² Miangö könaŋi kewö: Gamu qem enŋibi wösöbirik

akeak ewö, danön ölop uruni qesawölim niñgiiga kunbuk sösöngai miwikñaibilenjak? Janjuñinanğöra aka jim engibi wösöbirik akeak ewö, tosatñan sösöngai ak ningibingö osigetka nanak mewöyök wösöbirik aka malbilenbuk. Mianğöra zilañ kaba gamu qem engimamgö töközal.

³ Kimbi köhöikñi mi könani kewögöra ohoba alal: Nöñön söñgaibiga körek enön mönö nömbuk söñgaime. Nöñön inini körek mewö uruyahötñi qahö möt narim engizal. Nöñön tosatñi engöra sösöngai miwikñaaimamgö mötzalmö, kabiga könanjanini sohoi lañ malgetka engeka wösöbirik akilenbuk. ⁴ Wösöbirik akñegöra kimbi mi qahö ohoyalmö, önöñi qahö uru jöpaköm engimakzali, inini mianğö könani möt yakömegöra mönö keu köhöikñi mi kimbinöñ ohoyal. Urunan engöra aka waimanjat ketani möta könjilin qakñe tata imbilnan eriga ohoyal. Mewö.

Kunñan köna öñgiröhi, yanğö siñgisöndokñi mönö mosötme.

⁵ Kunöñ siñgisöndok aiga gamu aka wösöbirik asuhuyöhi, mianön mönö nöñgö qakneyök qahöpmö, körek engö qakñine mewöyök öñgöyök. Keu mi jim qaribi sohobapuköra mönö kewöyök jimam: Gamu mianön mönö körek dop köl engii mianğöra gwötpuk me borom kun wösöbirik aket. ⁶ Könagesö ölnan keuñanğö likepñi melen wañgigeri, mianön mönö dop köl wañgii uruñi kunbuk melenök.

⁷ Nalö kewöñe gamu aka wösöbirik keta bölökñi möriga mianön jem keleleñgöbapuköra mönö lömböt kude toroqem wañgime. Lömböt qahöpmö,

mönö kapanj köla siŋgisöndokŋi mosöta urukölalep ak waŋgime. ⁸ Mianğöra kewö uru kuŋgum eŋgizal: Injini mönö keu jöhöba urukalemŋini kunbuk toroqeba köhöiba kondel waŋgiba malme. ⁹ Nöŋön kimbini mi kewögöra ohoyal: Injini nöŋgö keuni pakpak tem köla esapesapnöŋ kin köhöime me qahö tem köla töteköba etme, mianğö könaji kewöta mötmamğöra möta mi ohoyal.

¹⁰ Injini kungö siŋgisöndokŋi mosötze ewö, nöŋön mi mewöyök mosöt waŋgizal. Bölöŋi ak niŋgiyöhi, mianğöra qahö mötpi öŋgözapmö, eŋön kunbuk ölöwaka mindirim aŋgumegöra mötzal. Mianğöra bölöŋamŋi mi lök Kraistkö jene ölna mosöt waŋgibiga teköyök. ¹¹ Satanöŋ areŋi ala silenöŋ alal könaji könaji ahakzawi, mianğöra tönpin qahö maljal. Mianğöra Satanöŋ luhut al neŋgibapuköra aka azi mianğö siŋgisöndokŋi mönö mosöt teköme. Mewö.

Polnöŋ Troas mala Taitusğöra waimanjat mörök.

¹² *Nöŋön Kraistkö Ölöwak Buŋaŋi jim sehimamğöra aka Troas taonöŋ anbiga Kembunöŋ nanğu öröm niŋgiiga nupŋi mianğoreŋ memamğö amqeyök. ¹³ Mewö amqeyökmö, urumelenj alani Taitus qahö miwikŋaibi keuŋini qahö jii möralaŋğöra aka waimanjat möta luainöŋ urune qahö ahöyök. Mianğöra yaizözkökŋini jiba eŋğomosöta Taitus jarumamğöra Masedonia prowinsnöŋ anal. Mewö.

Kraistnöŋ ösum neŋgiiga luhut alakzin.

¹⁴ Neŋön Anutu kewögöra möpöseimakin: Kraistkö buŋa aka welenni qeinga Anutunöŋ

* 2:12: Apo 20.1

nalö dop suahö galöm ewö aka nenġuanġiriga anda köiraŋ kölakzin. Luhutnöŋ plaua juranġö wöronŋi ölöpnġi memba kaiga mörakzin. Mianġö dop Anutunöŋ nam köl nenġiiga denike denike liliköba Kraistkö könaŋi jim asariinga aukŋe asuhum sehiba aniga gölme dop mörakze. Mianġöra Anutu möpöseimakzin.

¹⁵ Mianġö könaŋi kewö: Nenġon ambazip Suep mire öŋgömei aka könöp sianöŋ gemei, yeŋgö sutŋine anda kainga wöronini sarakŋi mörakze. Kraistkö könaŋi jim sehiinga Anutunöŋ nupni-naŋgö wöronŋi möt ölöwahakza.

¹⁶ Könöp sianöŋ gemei, yeŋön Buŋa keunini mötketka mianġon keuŋini jim teköiga kömum köhöimegö möta mönö qamötkö mumu wöronŋi ewö akza. Suep mire öŋgömei, yeŋön Buŋa keunini mötketka oyaenġkoyaenġ enġimapkö möta mönö malmal kömbönaŋanġö wöronŋi umköhöwakŋambuk ewö akza. Daŋön nup mewöŋi memawaŋgö dop akza? ¹⁷ Ambazip tosatŋi gwötpukŋan mönö ni ewö qahö akze. Yeŋön malmalŋini naŋgöbingöra möta Anutugöreŋ keu mi kölköl-örörö ewö laŋ memba ala jimakze. Nöŋön yeŋgö dop qahö ahakzalmö, Kraist qekötahöba köŋbiŋ mosöta uruni sarakŋi aiga kinjal. Anutunöŋ melaim niŋgiyöhi, mi möta yaŋgö jemesoholŋe kinda Buŋa keuŋi törörök jim sehimakzal. Mewö.

3

Jöhöjöhö areŋ döläkŋanġö nup meme ambazip akzin.

¹ Nanak kõnaŋamni kunbuk kõnahiba jim ölöwakŋamaŋgöra mötmörize me? Mi qahö. Nup meme ambazip tosatŋan Korint eñön yeŋgö kõnaŋini mötmegöra möta jim ölöwak kimbi ohobingö kapaŋ kölakze. Tosatŋan Korint eñön yeŋgö kõnaŋini naŋgöba jiba jim ölöwak kimbiŋi kimbiŋi ohomegöra iŋini kuŋgum eŋgimakze. Nöñön nupni diŋdiŋanök mealanğöra jim ölöwak kimbi mewöŋanğöra qahö osizal. ² Anutunöŋ Korint iŋini böröne al eŋgii letota wölböt kötŋi aka nanŋinak nöŋgö jim ölöwak kimbi ewö akze. Anutunöŋ nöŋgö jim ölöwak kimbi mewö ohoiga ambazip körekŋan silik tandökŋini dölöknj mi eka oyoŋmakze.

³* Iŋini Kraistkö papia kimbi ewö akzei, mianñön aukŋe ahöza. Mosesnöŋ Köna keuŋi naŋim oŋi iŋk mianñön köt tafenöŋ ohoyöhi, iŋini mianğö dop qahö akzemö, Kraistnöŋ kimbiŋi eŋgö uruŋinaŋgö tafene kewö ohoi kinje: Neñön nup meinga ölnj asuhui Kraistnöŋ Anutu malmal köhöikŋi Toŋanğö Uŋaŋi uruŋine ali letotket. Ambazipnöŋ nupni-naŋgö ölnj mi eketka mianñön bauköm eŋgiiga nup-ninaŋgö kõnaŋi möt asarimakze.

⁴ Kraistpuk qekötahöinga Anutunöŋ nupninaŋgö tandökŋi mötza. Mianğöra nup meinga iŋini Kraistkö buŋaŋi akeri, mi ölöp Anutugö jeŋe awösamakak kinda jizin. ⁵ Nanini köhököhöi qakŋe nup ölöpnj ki Anutugö jeŋe membinanğö dop akzini, mewö ölöp qahö jibin. Nanini yuai kunöŋ qahö lapinğömakzinmö, Anutunöŋ nanñök inahöba mötmöt neŋgiiga nup ki memakzin.

* **3:3:** Eks 24.12; Jer 31.33; Eze 11.19; 36.26

⁶ *Anutunöŋ inahöba mötmöt neŋgiiga jöhöjöhö areŋ dölökŋaŋgö nup meme ambazip akzin. Mosesgö Köna keuŋaŋgö kulemŋi mohot mohotköra urukönöp akinak ewö, keu mianön mönö keunini jim teköiga kömum köhöibinak. Uŋa Töröŋaŋgö nup areŋi jim asariinga yaŋön mem gulim neŋgiiga mal köhöibin. Miangöra Köna keugö areŋi miyök wuatangömegöra qahö kapan kölakzinmö, Uŋa Töröŋi möt aŋgön kölmegöra uru kuŋgum eŋgimakzin. Mewö.

Jöhöjöhö areŋ dölökŋaŋgö nupŋi mi aködamunŋambuk.

⁷ *Anutunöŋ Köna keuŋi jiba kulemŋi kötnöŋ möndömgöba ohoyökmö, ambazipnöŋ mi qahö tem kölgetka Anutunöŋ keu miangö dop kewöta likepŋi melen eŋgiiga kömumba köhömuŋi mala kotket. Anutunöŋ mutuk Köna keuŋi neŋgiiga nalö miangöreŋ asakmararaŋan Mosesgö jemesoholŋi qei asariyök. Asakmararaŋ mianön waziba ayapkömawaŋgö dop ahökmö, mi töndup Israel ambazipnöŋ jemesoholŋi törörök uba ekingö dop qahö aket. Gwötpuk asariyöhaŋgöra mi osiget. Köna keugö Buŋa areŋ walŋan lök mewö asakmararaŋambuk asuhuyök.

⁸ Mewö asuhuyökmö, Uŋa Töröŋan Buŋa areŋ dölökŋi neŋgi miangö asakmararaŋan asuhumawi, mianön mönö jöhöjöhö areŋ walŋaŋgö asakmararaŋi oŋgita önöŋi qahö asariba jenini gamugamu ahakŋa. ⁹ Mutuk Mosesgö Köna keu asuhuba kewöt neŋgiiga miangö dop könöp siagö buŋaya akzin. Buŋa keu mi lök

* 3:6: Jer 31.31 * 3:7: Eks 34.29

aködamunꞑambuk asuhuyök. Mianꞑöra Anutunöꞑ keunini kewöta jim teköi solanibini, Buꝼa keu mianꝼö aködamunꝼan mönö keta bölöknꝼi akza. Mianꝼön jöhöjöhö areꝼ walꝼaꝼꝼö aködamunꝼi mi gwötꝼuk oꝼgita qetbuꝼaꝼambuk akza.

¹⁰ Buꝼa nup walꝼan mutuk aködamunꝼambuk ahökmö, mi Buꝼa nup areꝼ dölöknꝼambuk mindiriba kewöringa walꝼi mianꝼön mönö qetbuꝼaꝼi qahö akza. Uꝼa Töröꝼaꝼꝼö nup areꝼ mianꝼö aködamunꝼan öꝼgöꝼgöꝼi akzawaꝼgöra nup areꝼ walꝼan mönö yuai omaꝼi ewö akza.

¹¹ Anutu amötqeqeꝼaꝼꝼö köna walꝼan lök waziba ayapkömawaꝼö dop ahök. Mianꝼön lök asakmararaꝼambuk asuhuyök. Mianꝼöra köna dölöknꝼi teteköꝼi qahö ahöm öꝼgömawi, mianꝼö asakmararaꝼan mönö köna mutukꝼaꝼꝼö asakmararaꝼi mi önöꝼi qahö oꝼgita jenini gamugamu ahakza.

¹² Jöhöjöhö dölöknꝼan teteköꝼi qahö bauköm neꝼgiiga asakmararaꝼan asuhumawi, mewö Anutu jörömꝼöröm al waꝼgimakzin. Mianꝼöra keꝼgötnini qahöpmahöp möta awösamkakak kinda keu mi kusum eꝼgimakzin. ¹³ *Mosesnöꝼ Israel ambazip asakmararaꝼ waziba ayapköyöhi, mi ehibepuköra manjat möta jemesoholꝼi opo jahönꝼan esuhuyök. Neꝼön mianꝼö dop qahö ahakzinmö, Buꝼanini aukꝼeyök jimakzin.

¹⁴ Buꝼa walꝼaꝼꝼö asakmararaꝼi eketmö, uruꝼinan töndup gwözöꝼi laꝼ mala kotket. Nalö kewöꝼe mewöyök yuai kunꝼan mönö opo jöhan mianꝼö dop Juda ambazip gwötꝼuk yeꝼgö uruꝼini

* 3:13: Eks 34.33

gwözöŋni malje. Mianğöra Jöhöjöhö Walŋaŋgö Buŋa keuŋi keuŋi oyoŋjei, mienğö könaŋini mi törörök qahö möt asarimakze. Uruŋini melenđa Kraistpuk toroqegetka mewö mianjönök mönö opo jöhanŋini mi qeköi möt asarime. ¹⁵ Nalö kewöŋe mewöyök Mosesgö Köna keuŋi oyoŋgetka yuai kunŋan mönö opo jöhan ewö uruŋini gwözöŋni mötmötŋinan lömbörii malje.

¹⁶* Mewö maljemö, Buŋa Kimbigö keu kun kewö ahöza, “Mosesnöŋ ‘Kembubuk eraum mötpit,’ jiba opo jöhanŋi mesoholŋeyök qeközapma.” Keu mewö ahöiga yeŋgöreŋök kunŋan uruŋi melenđa Kembubuk toroqezawi, nalö mianğöreŋök mönö yuai opo jöhanŋaŋgö dop mi qeköi Anutugö amötqeŋeŋaŋgö könaŋi möt asarima. ¹⁷ Keu mianjön “Kembugöra” jiba mi mönö Kembugö Uŋaŋaŋgöra jiza. Kembugö Uŋa Töröŋan denike yeŋgö uruŋine maljawi, yaŋön mönö siŋgisöndokŋinaŋgö kösöŋi pösariga solanŋi (fri) malje. (Mewö mala solanŋi diŋdiŋi akingöra Köna keu wuatŋöbingö qahö kapaŋ kölakze.)

¹⁸ Mianğö dop urunini melenŋinga Kembugö asakmararaŋan körek neŋgö je mesoholnine kuŋguiga bilikbilik aliga jenini qahö esuhuinga ambazipnöŋ neŋgeka Anutugö aködamunŋi qetpuk mi piliknöŋ uba ehökö tandök ehakze. Nini mi qarim sehiba ehakŋeaŋgö dop letorakin. Mewö letota aködamunŋi qetpuk mi qariba asariba Kembugö tandöktandök ahakin. Kembunöŋ Uŋaya akzawi, yaŋgö asakmararaŋan mönö mewö mem letot neŋgimakza. Mewö.

* **3:16:** Eks 34.34

4

Nini kouranjen ewö ahinga Unja Töröñan ölni akza.

¹ Anutunöñ ak kömum neñgiyöhanğö dop nup ki qaknine ali memakzini, mianğöra mönö böñ kininga uruninan qahö etma. Qahö! ² Neñön nup memegö köna tölapñi gamuñinambuk mi körek andö qein. Tilipqilip qahö aka Anutugö keuñi qahö möwöramğömakzinmö, keu ölni mi aukñeyök alakzin. Mewö Anutugö jemesoholñe ambazip uruölöwak möt neñgimeğöra kininga jim ölöwak keuninan asuhui körekñan keunöñ törörök jim neñgibingö osimakze.

³ Mewö ahakzinmö, inñini tosatñan kewö jimakze, “Polnöñ Ölöwak Buñani mi esuñambuk jimakza.” Mewö jibilenak ewö, esu mianñön könöp sianöñ gemei, mönö yeñğö uruñine ahöba mianğöra gwözöñniga qakömakze.

⁴ Kraistnöñ Anutugö imutñi akza. Kraistkö aködamunñi mi nanñi Ölöwak Buñanan indela asakñi ewö asarimakzapmö, yeñğö jeñinan ömuñ köli jipjap ahakza. Nalö kewöñe bölöñanğö Kem-buñi gölme dop galöm köl eñgimakzawi, yañön urumelenğö kopa ambazip yeñğö mötmöt jeñini mem gömöliiga lañ malje. Mianğöra Ölöwak Buñagö asakñi ek asaribingö osimakze.

⁵ Nani qetbuñanan qarimapkö Buña keuñi qahö jim asarimakzalmö, eñön Kembu Jisös Kraistkö könañi möta jitñi tem kölmegöra uru kuñgum eñgimakzal. Neñön Kembugö jitñi wuatangöba inñini welen qem eñgimakzin. ⁶ *Könañi kewögöra welen qem eñgimakzin: Anutunöñ mutuk kewö jim

* 4:6: Jen 1.3

kutuyök, “Asaknan mönö söñaup qeiga asarima.” Mewö jiyöhañön mönö Buñañangö asakñi ali urunini qeiga asariyök. Kraistnön ahakmemeni aka meiga Anutugö asakmararajan jemesoholje asarii ekeri, Anutunön nini miangö könañi möt kutubingöra kapañ kölakza. Asakñangö könañi jim sehibingöra aka asakñi mi neñgiyök.

⁷ Asakñan urunini qei asariinga mötkutukutu miangö bohonñi mi milyön kina onçita öngöngöñi akzapmö, silenini mi kouranen ewö amqeba julakza. Anutu asakñan mönö sile mewöñangö uruñe ahöza. Ambazipnön miangö könañi ekñegöra Anutunön areñi al neñgiyök. Dopkeu miangö könañi kewö: Kukösum önöñi qahö al neñgimakzawi, mi neñgöreñök öne asuhumakzawangö dop qahöpmö, Anutunön mönö miangö Tonji akza.

⁸ Eu emu likep likep miangöreñök lömböt könañi könañi qaknine öngöba qölölömbörim neñgigetka wahöjalij mörakzin. Mi mörakzinmö, töndup mienön qahö qözöjahöm neñgigetka erakzin. Nalö tosatñe juñ ewö wangömmje qaköba köna qahö miwikñaimakzinmö, töndup tötböröm qahö ahakzin.

⁹ Ambazipnön sesewerowero ak neñgimakzemö, Anutunön andö qahö neñgumakza. Ambazipnön mulungöm neñgimakzemö, töndup qahö ayuhumakzin. ¹⁰ Jisös qem kömugeri, miangö dop nini mewöñanök buñañi jim sehimakzinangöra aka neñguget kömumbinbukö möta anda kaba maljin. Jisösbuk mal köhöininga inahöm neñgimakzawi, ambazipnön miangö könañi möt kutumegöra aka mewö malbingö urumohot akzin.

11 Gölmenöŋ jebuk mala Jisösgö nupŋi memakzinaŋgöra aka nalö dop kömumbingö dop akzin. Sileninan kömumawaŋgö dop akzapmö, Jisösnöŋ urunine mal köhöiba silenini mem gulimakzawi, ambazipnöŋ mianŋö ölni ek asarimegöra aka kinjin. ¹²Nini nalö dop sihimbölä möta kömumbingö dop ahakzinmö, nöŋön enŋö sutŋine nup memba malali, enŋön mianŋöra aka guliba malmal köhöikŋe aŋgota mal öŋgöme.

¹³ *Sumbara (Sam) kunöŋ keu kewö ohoget ahöza, “Anutu möt nariba kömupnöhök meköm niŋgimapkö köuluköba malal.” Neŋön keu mianŋö dop kömupnöhök meköm neŋgimapkö möt narizin. Mötnaripkö Uŋa Töröŋi miyök buŋa qem aŋguzinaŋgöra neŋön mönö mewöyök keunini jiba köulukömakzin. ¹⁴ Anutunöŋ Kembu Jisös mem guli kömupnöhök wahöröhi, yaŋön mönö nini mewöyök mem gulim neŋgii wahöta Jisösbuk öŋgöinga jemesoholŋe al neŋgii embuk mohotŋe mal öŋgöbin. Mi mötzinaŋgöra aka keunini jiba köulukömakzin.

¹⁵ Keunini jiba köuluköinga Anutugö kalem möriamŋan toroqeba ambazip sehisehiŋi dop köl enŋima. Mewö aiga yeŋön amqeba Anutu kelenmaleleŋ möpöseigetka qetbuŋaŋan sehimakza. Enŋön mewöyök Anutu möpöseim sehimegöra mötzal. Mianŋöra lömböt könaŋi könaŋi bisiba aum-möriba maljin.

Mötnarip malmalŋaŋgö tandök mi kewö:

¹⁶ Nini mem gulim neŋgimapkö möta mönö böŋ qeba kininga uruninan qahö etma. Ölna silenini

* 4:13: Sum 116.10

ewö waziba soholimakzinmö, mi töndup urunini ewö nalö dop kölönaimakzin. ¹⁷ Mi kewögöra: Gölmenöŋ kahasililiŋ nalö töröptökŋi möta malbinmö, mianğö andöŋe asakmararaŋ önöŋi qahö miwikŋaiba teteköŋi qahö oyaenŋkoyaen malbin. Asakmararaŋ aka kahasililiŋ yahöt mi kewöt etkiinga asakmararaŋ mianğön mönö öŋgöŋgöŋi aiga gölmegö kahasililiŋ könaŋi könaŋi mi möringa awamŋi aka eretŋi akza.

¹⁸ Ambazip aka öröyuai jenöŋ ehekŋi mi nalöŋini teköi ayapkömömö, Suep mirigö öröyuaiŋi nalö kewöŋe qahö ehakzini, mienğön mönö nalö teteköŋi qahö ahöm öŋgöme. Mianğöra neŋön jeninan ehekŋi mia qahöpmö, qahö ehekŋi mönö mienğöreŋ göröken uba engehakzin. Mewö.

5

Polnöŋ Suepkö oyaenŋkoyaen koumnöŋ anmamgö mörök.

¹ Neŋön keu ki mötzin: Gölme silegö opo seri koumŋe malinga kömupnöŋ mi köndeŋniga etmawi, Anutunöŋ nalö mianğöreŋ silegö miri dölökŋi nanŋak meiga Suepnöŋ ahömawi, mi buŋa qem neŋgiiga mianğöreŋ malbin. Silegö miri qainŋi kun mi teteköŋi qahö köhöikŋi ahöm öŋgöma.

² Keu mi möta nalö sutŋe kianğöreŋ letotpingö osongom köla Suep malmal mirinine öŋgöbingö möta awöweŋgömakzin. ³ Suepnöŋ öŋgöinga sile qainŋi kunöŋ löŋgöt neŋgi tatpini, nalö mianğöreŋ mönö uŋa sile meinga kunŋan aukŋe qahö miwikŋaim neŋgima.

⁴ Gölme sile ki qekömegöra qahö mötzinmö, Suep malmal mirinine öngöba silenini dölökñi memingö awöweñgömakzin. Sile ki kömumawi, mi malmal köhöikñan gwahöri qahöwahiga Anutunöñ salupñe oyaenköyaen sileya neñgimapkö mötzin. Miañgöra nalö kewöñe seri koum kiangö uruñe mala urulömbötnini bisiba letotpingö osoñgom ahakzin. ⁵ Anutu nanñak Suep sile memingöra möta miwikñaim neñgiba Uña Töröñi urunine aliga oyaenköyaen akingö dangunuñi akza.

⁶ Miañgöra neñön mönö nalö dop ewebibin- inambuk saitñgit mal köhöiba kewö mörakzin: Sileninangö malmal koumnine ki malbini, nalö miañgö dop eu Suep malmal mirinine Kembu Jisösbuk qahö malbin. ⁷ Nalö kewöñe Suep mirigö öröyuaini qahö uba engehakzinmö, töndup mi möt nariba miañgö dop aka memba malinga nam köl neñgimakze. ⁸ Miañgöra ewebibininambuk köhöiba sileninanangö malmal koumñi ki mosöttingö kapan köla mirinini ölni eu öngöba Kembubuk malbingö mötzin.

⁹ Miañgöra mirinine ki me eu malbini, neñön mönö urunini Kembu Jisös uruölöwak ak wañgibingöra jöhöba miañgöra köhöiba kapan kölakzin. ¹⁰ *Miañgö könani kewö: Körek neñön mönö Kraistkö keu jakene asuhubin. Gölmenöñ silebuk mala Kembugö jitsihitñi dopñe tem kölini me qötömötötañ ahini me önewat lañ malini, nanñak mönö keunini mi kewöta miañgö dop töwanini nanñök nanñök neñgii buña qem anğubin. Mewö.

* 5:10: Rom 14.10

Ambazip Anutubuk urumohot ak̄negö nup̄ji memakzin.

¹¹ Kraistkö keu jakeŋe kinbini, neŋön mi möta Kembugö mötmöt̄ji oŋgitpinbuköra keŋgötnini mörakzin. Mi mötzinaŋgöra ambazip kōnanini sarak̄ji mötmegöra kapaŋ köla uru kuŋgum eŋgimakzin. Kōnaninan mönō Anutugö jeŋe auk̄ŋe ahōza. Nōŋön tilipq̄lip azia qahö, eŋön mewöyök mi uruŋinan möt yakōmegöra möta jöröm̄qöröm akzal.

¹² Mewö jiba nanini jim ölöwak keunini mötmegöra kunbuk qahö kapaŋ kölakzalmö, kōnanini miyök jim asarim eŋgimangö mötzal. In̄ini mi möta ölop neŋgö silenini mi böhi takapulakaŋi yeŋgö jeŋine möpöseigetka dop kölma. Yeŋön yuai eŋgö uruŋine ahōzawi, miaŋgöra qahöpmö, sileninaŋgö yuaiŋi jeŋöŋ ekingö dop akzawi, mönō miaŋgöra aiweliköba nan̄ini silenini memba öngöba keu laŋ jimakze. Miaŋgöra keuni ki jizal. Eŋön yeŋgö keuŋini gilipit̄ji (ambetak̄ji) mötzeangöra mönō neŋgö kōnanini jim asariba törörök melen eŋgime.

¹³ Eŋön nōŋgöra “Urusohop tandök ewö akza,” jiget ewö, nōŋön mönō Anutu nup̄ŋangöra aka urukönöp aka malal. Tosat̄ŋan nōŋgöra kewö jize, “Urukönöp̄ji qahöpmö, keuŋi ösöŋök jimakza,” Mewö jize ewö, mi mönō in̄ini baukōm eŋgibingöra aka ahal. Miaŋgöra ölum eŋgubapuk.

¹⁴ Miaŋgö kōnaŋi kewö: Kraistnōŋ jöpakōm neŋgimazawi, miaŋön mönō kondota kuŋgum neŋgiiga nup̄ji memakzin. Azi mohotnōŋ körek neŋgö salupnine neŋgö kömupnina kömuyök. Miaŋgöra siŋgisöndokninaŋgö likep̄ji qahö melen

nenngiyökmö, körek nenngö singisöndoknini mosöri toroqeba köhömuñi qahö akzin. Keu mi möt asariba möt yaközini, Kraistkö urukalemñan mönö körek nini jölöngöba nupñi membingöra kuñgum nenngimakza.

¹⁵ Yañön mönö kewögöra körek nenngö salupnine kömuyök: Gölmenöñ jebuk maljini, nenñön mönö malmalnini toroqeba naninañgörök malbinbuk. Mewö qahöpmö, kun nenngöra aka kömumba wahöröhi, malmalnini mönö yañgöra tököba ala malbingöra kömuyök.

¹⁶ Miangöra urunini melenñini, nalö miangöreñök könahiba ambazip silesile qahö kewöt engizin. Ambazip kun gölmenöñ silikñangö dowök qahö möt kutum wañgizin. Mutuk Kraist kewöta möringa gölme azi töhön ahökmö, nalö kewöñe möt kutum wañgiinga Suepkö Amötqeqe Tonina akza. ¹⁷ Miangöra kunñan Kraistpuk qekötahöza ewö, yañön mönö ahuahu dölökñi ahuba dömnji dölökñi akza. Malmal walñan ayapköiga malmal dölökñan mönö salupñe asuhum wañgiza.

¹⁸ Mewö maljapmö, yuai pakpak miangö kondotkondot Tonji mi Anutu. Yañön Kraist melaiiga töwanini qeba nenngömeiga Anutu nanñambuk urumohot akingö könaji möwölöhöyök. Köna mewö asuhuiga Anutunöñ nup nenngiiga nenñön ambazip Anutugö alaurupñi akñegöra jölöngöba kuñgum engimakzin.

¹⁹ Anutubuk urumohot akingö könaji kewö: Kraistnöñ eta gölmeñi gölmeñi nenngö töwanini qeiga dop köli Anutunöñ nenngömeiga alaurupñi ahin. Köna ongita mala korini, singisöndok miengö

keuḅini qahö oyoḅda mötmöriba likepḅi qahö melenḅ neḅgiyök. Anutugö alaurupḅi ahinga möt narim neḅgiba Kraistkö töwagöra aka Anutubuk urumohot akingö Buḅa keuḅi mi börönine alök.

²⁰ Mi aliga Kraistkö jitḅememeurupḅi akzin. Anutunöḅ keu saḅep al neḅgii miaḅgö dop ambazip uruḅini kuḅgum eḅgimakzin. Kraistkö jitḅi memba kapaḅ köla kewö qesim eḅgimakzin: Mönö Kraistkö töwaḅi buḅa qem aḅguba Anutugö alaurupḅi akḅe.

²¹ Anutunöḅ körek neḅgö siḅgisöndokninangö keuḅi jim teköba likepḅi melenḅda Kraist siḅgisöndok kun qahö ahöhaḅgö qakḅe ali öḅgöiga salupnine sihimbölö mörök. Kraistkö sihimbölöḅi miaḅgöra aka yaḅgöreḅ qekötahöinga Anutunöḅ ölöḅ keunini jim teköi solanibin. Mewö.

6

¹ Nini Anutu nanḅangö nup meme alaurupḅi akzinangöra aka uruḅini kewö kuḅguzin: Anutugö kalem möriamḅan omaḅi akapuköra mi mönö buḅa qem aḅguba malme. ²*Anutunöḅ keu kun kewö jii Buḅa Kimbinöḅ ahöza,

“Gehorimangö nalönan kam kuḅguiga nöḅön köuluki möral. Amötqeḅe nalönan kam kuḅguiga miaḅgöreḅ bauköm gihial.”

Keu mewö ahöiga mötket! Nalö dölkiaḅön mönö Anutugö amötqeḅe nalöḅi akza. Anutunöḅ eḅgehorimangö möri nalöḅan kam kuḅguiga akkömükömuḅi mi mönö döлки buḅa qem aḅgume. Mewö.

Polnöḅ kahasililiḅ könaḅi könaḅi miwikiḅaiyök.

* 6:2: Ais 49.8

³ Neñon mönö kungö uruñan neñgöra aka bölii etpapuköra galömnini mem anğumakzin. Jim neñgigetka nupninan keuñambuk aka etpapuköra mewö ahakzin. ⁴ Anutugö nup meme ambazip ölop sorokñi akzini, ahakmeme pakpakninan mönö mi kondelakza. Kahasililin aka jañgauranga könañi könañi ak neñgigetka wahöjalın uruñe maljinmö, miangöreñ mönö mökösoñda kapan köla kin köhöimakzin.

⁵ *Ihilek wahiñambuknöñ neñguba kösö miriñi miriñi miangöreñ al neñgigetka malin. Karimñi karimñi asuhugetka miangö uruñe kömumbinbukö keñgötnini möta malin. Gaun guli aka nenegöra wösönini aliga malinmö, töndup silenini qeba nup memba malin.

⁶ Ahakmeme sarakñi wuatangöba Anutugö sihimñi möt asariba lömböt möta mökösoñda ambazip ala ak engimakzin. Uña Töröñan urunini kokolak qeiga sutñine geñmoñi qahö jöpaköm engiba maljin. ⁷ Keu ölnanök jiinga Anutugö kukösumñan bohon köl neñgiiga ahakmeme solanñangö timbi saiwañi meinga börö ölnine aka qaninine ahöiga kinjin. Mewö kinda likep Buña keu jim sehiba likep keu munenji silenine algetka miangö likepñi jim mindiñgöba malin.

⁸ Qetbuña neñgigetka silenini qahö möpöseimakzin. Yom jiba gamu qem neñgigetka uruninan qahö erakza. Neñgöra kösohot ölopñi kösohot bölöñi mi lañ jimakze. Munenji jiji ambazip ewö ak neñgimazemö, töndup keu ölnanök pakpak jimakzin.

* 6:5: Apo 16.23

⁹ Ambazipnönj könanini ölop möt kutumakzemö, töndup tosatñan nönöñgan aka nesampurek ak neñgimakze. Nalö tosatñe kömumbingö aka malinmö, töndup toroqeba jebuk maljin. Kegwekkahasiliñ ewö neñguba malgetmö, töndup qahö kömuin. ¹⁰ Wösöbiriknönj neñguiga töndup nalö dop söñgaiba maljin. Wanapñi mala töndup ambazip gwötpuk hauköm enñiinga uruñinan pomñi ahakze. Gölmegö sukinapnini qahöpmö, töndup oyaenñkoyaenñ pakpak buña qem añguba pipsimbawon maljin.

¹¹ O Korint ambazip, neñön mönö uruninañgö nañguñi enñgöra öröba keu kun qahö kölin geiga könanini aukñeyök jibiga mötze. ¹² Enñön neñgö urumötmötnini mötpepuköra mi qahö añgön kölakzinmö, neñön enñgö uruñini mötpinbuköra mönö nanñinanök añgön köl añgumakze.

¹³ Nöñön urumötmötni enñgibiga enñön mönö mianñgö likepñi mewöyök törörök niñgime. Nöñön nahönböaturupni ewö tandök keu enñgöra kewö jiba ohozal: Inñini mewöyök mönö nanñini uruñinañgö nañguñi öröba urukalemñini mi sehiba kondel neñgime. Mewö.

Mötnariññini qahö yembuk kude qekötahöme.

¹⁴ Ambazip uruñini qahö melenñeri, yembuk mönö uruñini kude jöhöba* örörönj kude malme. Malmal solanñi aka malmal gonñonñi mi nanñök nanñök akzahot. Mi mindirim etkibingö osibin. Söñaup aka asakñi mi mohotñe qahö

* **6:14:** Könjönj me mötöp (yoke) mi hos me bulkamau yahötkö imbiñire alget geiga kare me kinonñ yuai örömakzahot. Mewö nanñiri imbi-imbi akitkö osimakzahot. Mewö janñuñ anbanbuk.

akzahot. Qahö! ¹⁵ Kraist aka Katakömulat (Satan) yetkön mönö urumohot aka mohotje malbitkö osimahot. Miangöra urumelen ambazip kunjan ahakmemeni urumelenö kopa ambazip kun yambuk mohotje mindiriba akitkö osimakjahot.

¹⁶ *Anutu nanjak keuji kun kewö jii ahöza,
 “Nöñön könagesöni yengö urujine mala sutjine
 anda kaba Kembunini ak engibiga yejön
 nöngö weleni qeba möpöseim niñgiba
 malme.”

Keu miangö dop Anutugö Uñanan urujine maliga sileninan Anutu malmal köhöikni Tonangö jikenj akza. Anutunöñ nanji jöwöwöl jikenje tandö lop-ion möpöseibingö songo ali ahöi osimakzin. Anutugö jikenj aka asa jikenj mi inannök inannök. Miangö dop neñön urumelenö kopa ambazip yembuk qekötahöbingö songo ali ahöi osimakzin.

¹⁷ Miangöra injini mönö Kembunöñ keu kewö jiyöhanö dop akje,
 “I mönö engömosöta yaigep kaba kambu nanji kun
 malme.

Angöjörakñinambuk ahakzei, mi mönö kude engoseigetka nöñön möt angön köla köyan kölon engiba malmam.

¹⁸ Nöñön mönö Iwiñini akiga injini nöngö nahönböraturopni aka malme.
 Kembu kukösum pakpakö Tonjan mewö jiza.”
 Mewö.

7

¹ O wölböt alaurupni, Anutunöñ mönö köyan

* **6:16:** Lew 26.12; Eze 37.27; 1 Kor 3.16; 6.19; Ais 52.11; 2 Sml 7.14; 1 Hist 17.13; Ais 43.6; Jer 31.9

köl neŋgimangö keuŋi mewö jöhöm neŋgii ahöza. Miaŋgöra yuai sile uŋanini mem tölöhozawi, neŋön mönö mi körek qeköbingöra Kraist köuluköinga amöt qem neŋgima. Anutugö jitŋi oŋgitpinbuköra mönö keŋgötnini möta kapan kölinga mem solanim neŋgiiga sarakŋi ak teköbin. Mewö.

Uruŋini meleŋgeraŋgöra Polnöŋ uruölöwak mörök.

² Neŋön kun qahö mem bölim waŋgiinga ayuhuyök. Kun qahö geŋmororoŋ ak waŋgiin. Miaŋgöra eŋön mönö uruŋinaŋgö naŋguŋi öröba nini urunöŋ jöhöm neŋgiba malme. ³ Tosatŋan sutŋine nup memba silenöŋ alal keu mewö jiba jim neŋgigetmö, nöŋön keu mi eŋgö keuŋini jim teköba likepŋi meleŋ eŋgimangöra aka qahö jizal. Nöŋön lök keu kewö jibi mötket: Neŋön uruninaŋgö naŋguŋi öröba iŋini uruninan jöhöm eŋgimakzin. Mewö aka ölop embuk öröröŋ jöhöba kömumbin aka öröröŋ mal köhöbin.

⁴ Eŋgö uruyahöt qahö mötnaripni ketanŋi eŋgiba maljal. Eŋgö silenŋini mönö gwötpuk möpöseimakzal. Eŋgöra aka urukölalepni ketanŋi miwikŋaizalaŋgöra kahasililiŋ könaŋi könaŋi möta miaŋgöreŋ mönö töndup önöŋi qahö söŋgaizal.

Masedonia prowinsnöŋ anda Taitusbuk aitoŋgöit.

⁵ *Taitus jaruba malalaŋgöra* jiali, keu mi toroqeba jimam. Masedonia prowinsnöŋ kaŋgota miaŋgöreŋ mönö mewöyök uruluai miwikŋaimangö osial. Denike denike anali, miaŋgöreŋ mönö köŋjiliŋ könaŋi könaŋi

* 7:5: 2 Kor 2.13 * 7:5: 2 Kor 2.13 miaŋgöreŋ Taitusgöra jiyök.

miwikñai. Anutugö bim qeba tosatñi yembuk anjururuk aka enğöra waimanjat möta malal. ⁶ Mewö malalmö, Anutunöñ urueret ambazip nanğöm nenğimakzawi, yañön mönö Taitus kayöhi, mianñön urukölalep ak niñgiyök.

⁷ Taitusnöñ kayöhi, mianñönök qahöpmö, Korint enñön urukölalep ak wanğigetka yañön jii mötpiga Anutunöñ mianñön mewöyök urukölalep ak niñgiyök. Enğö kösohotñini kewö jiyök, “Enñön ni nekingö köpösöngöba kinje. Wösöñini ölña möt niñgiba lömböt niñgigeranğö keunji jiba nöngö likepne nanğöba jibingö jöjörömakze.” Kösohot mi jii möta urusösöngai keta bölökñi möral.

⁸ Nöñön uruñini Buña keunöñ kuñguba kimbi mi ohobi oyoñda nanñini möt bölim anğugeri, mianğöra qahö möt bölim anğuzal. Mutuk möt bölim anğuyali, mi töndup nalö kewöñe kewögöra kunbuk söñgaizal: Kimbi keunan uruñini mem bölü wösöbirik aketmö, wösöbirik mianñön mönö melenđa nalö töröptökñanök ahöba teköyök. Könañini mewö ehal.

⁹ Nalö kewöñe iñini möt bölim anğugerañgöra aka qahö söñgaizalmö, kewögöra söñgaizal: Iñini ahakmemeninañgöra aka möt bölim anğugetka gamu wösöbirikñinan bauköm enğiiga uruñini kunbuk melenđa diñgiget. Mi Anutugö jitañgö dop asuhiğa uruñinan mönö nenğöra aka qahö bölüyökmö, ölña bauköm enğial.

¹⁰ Siñgisöndökñinañgöra aka möt bölim anğuzin ewö, gamu wösöbirik mianñön mönö bauköm enğiiga urunini kunbuk melenđa diñgibin. Diñgibinañgöreñ Anutunöñ mönö nenğuanğiri

Suepnöŋ öngöbin. Mianğöra kunŋan uruŋi melenđa mianğöra qahö möt bölim aŋguma. Gölme ambazip tosatŋan siŋgisöndokŋinaŋgö wösöbirik mörazzemö, Anutunöŋ mi mosötmapkö qahö qesime ewö, yaŋön mönö likepŋi melenj enjiiga kömum köhöime.

¹¹ Eŋön Anutugö sihimŋaŋgö dop wösöbirik aketka gamu mianğö ölnjan uruŋine ahui letotkeri, mi kewöta ek welipköba kewö jime, “Nini gönmönahotnini mosöta urunini tokoba urukönöp qakŋe wahöta könanini sohosohoŋi kewöta mindiŋöin. Ambazip siŋgisöndok akeri, mienğöra uruninan wahöri sisit memba jim enjiin. Anutugö jitŋi oŋgitpinbuköra auruba keŋgötnini möta Polnöŋ kaba uru melenjinaŋgö ölni ekŋapkö köpösöŋgöba malin. Urunini ahakmeme diŋdiŋi akingöra alin aka kunöŋ köna qiwitipköyöhi, mi mindiŋöm waŋgibingö jöjöröba malin.” Mewö jigetka dop kölma. Nalö kewöŋe köna diŋdiŋi wuatangözei, mi kondel niŋgigetka ehal.

¹² Mianğöra kunŋan sutŋine böliyöhi, iyök mindiŋöm waŋgimegöra aka kimbini qahö ohoyal me kun i mem bölim waŋgiyöhi, iyök bauköm enjimegöra kimbi mi qahö ohoba alal. Mi kewögöra ohoyal: Inini Anutugö jemesoholŋe nömbuk urumohot akingö kapan kölakzei, silik mianjön mönö aukŋe asuhumapköra kimbi mi ohoyal.

¹³ Nani urukölalepni miyök qahö mötzalmö, Taitusgö uruŋan sutŋine ölöwahi ehinga mianjön mewöyök uruni naŋgöi önöŋi qahö söŋgaimakzal. Eŋön körekŋanök Taitus körö-ölöwak qem waŋgigeranğöra söŋgaimakzawi, sö söŋgai mianjön mönö mewöyök naŋgöm köl niŋgii mianğöra önöŋi

qahö söngäizal. ¹⁴ Nöñön silikñinanğöra silenini Taitusgö jeñe möpöseiba malali, enñon mianğöra gamu qahö niñgiget. Nöñön enğö sutñine mala keu pakpak jibi mötkeri, mi ölñanök jial. Mianğö dop enğö keuñini Taitusgö jeñe jim möpöseiba malali, keu mianñon mönö mewöñanök könanini mindinğögetka ölñi ahök.

¹⁵ Inini körek pakpak mönö nöngö keuni tem köla Taitusnöñ kaiga sömbuñinambuk möta jönömñini undui köl öröm wanğiget. Taitusnöñ silikñini mi mötmöriba keu jüiga uru ölöwakñan enğöra aka qariga köhöiba möpöseim enğimakza. ¹⁶ Nöñön ahakmemeñini pakpak mötmöriba mianğöreñ mönö ölöp enğöra aka ewebibinambuk möt köhöiba saitingit malmam. Mianğöra söngaimakzal. Mewö.

8

Urumelen alaurup nanğöm enğibingö keuñi

¹ *O urumelen alaurupni, Anutunöñ kalem möriamñi urumelen könagesöñi könagesöñi mianğöreñ nenñii ölñan mönö Masedonia prowins uruñe ölöpñanök asuhuyök. Nöñön inini mianğöra gukmaulem malbepüköra möta kösohotñi kewö jimam: ² Yenñon kahasililij miwikñaiba mötketka lömbötñambuk esapköm enñiiga wanapñi kötökñi maljemö, mi töndup önöñi qahö söngäigeranğöra aka urumelen alaurup nanğöm enğibingöra monen naluk keta bölökñi alget.

³ Yenğö könanini kewö nanğöba jimam: Kunñan qahö kuñgum enñii nannini sihimñinan töndup

* 8:1: Rom 15.26; Eks 16.18

ahuiga amqeba ösumñinanğö dop nalukñini alget aka mi tok oñgita engiget. ⁴ Yeñön mönö kapañ köla gwötpuk kuñgum neñgiba kewö uleta jiget, “Nini tok Judia prowinsgö ambazip sarakñi bauköm engibingö mötzin. Mianğöra Pol, gi ölop Oñ! jinönga mönö simbawoñ möta nup mianğö bahöñi amqeba membin.”

⁵ Mewö jiget jibiga naluk almegö mambörali, mianğö dowök qahöpmö, mi oñgita kewö aket: Yeñön mutuk nañğönağö Kembugö jeñe dop köljawi, mi akingöra uruñini jöhöget aka mianğö andöñe Anutugö jitñi tem kölbingö möta nanñini malmalñini mi mewöyök neñgö börönine alget. ⁶ Mianğöra Taitus kewö jim kutum wañgial, “Gi mönö nañğönağö nup mi lök könahiba menöñ. Mianğöra mi mönö toroqeba Korint könagesö bauköm enjinönga urukalemñini kondela monen naluk ketañi mi kunbuk toroqeba algetka sutñine teköma.”

⁷ Urugö yuai könañi könañi mi kelenmalelen buña qem aquba kewö aka malje: Ölopñanök Kraist möt nariba Buña keu ölni jim soroköba Anutugö sihimñi möt kutuba tosatñi nañgöm engibingö pöndañ köpösöngömakze. Eñön mönö tosatñi enğonğita ölopñanök jöpaköm neñgiba qetpuk akze. Mianğö dop nañğönağö nup ki mewöyök mönö ölop mem soroköba tosatñi enğonğitketka qetpuk akña.

⁸ Mewö jiba monen almegöra qahö jim kutum enğizal. Mi qahöpmö, urukalemñini geñmoñambuk akza me qahöwi, mönö mi esapesapnöñ ala könañini mötmangö mötzal. Könagesö tosatñan gönmönahot mosöta nañğönağö nupñini öl

töhönŋa memba zeŋ kinjei, keu mi jiba mianŋön inini esapköm enŋizal.

⁹ Naluk dawik almegöra kewötmei, mianŋören mönö Kembunini Jisös Kraistkö könanŋö tandökni mötmörime. Inini yanŋö kalem möriamni ketani mi kewö mötze: Yanŋön Suepkö öröyuai pakpakö Tonji öngöngöŋi ahökmö, tøndup inini oyaenŋoyaenŋö pomni akŋegöra aka gölmenöŋ eta etqeŋeŋi aka malmalŋi tököba mosörök.

¹⁰ Monenŋ almegöra qahö jim kutum enŋizalmö, Jisösnöŋ söpsöp alöhi, mianŋö dop qambaŋni miyök enŋizal. Enŋön yambu emune lök nanŋönanŋögö mutukni aka mianŋö nupni kapaŋ köla meget aka mi toroqeba membingö sihimni köhöikni mötket.

¹¹ Nalö kewöŋe nupni mi mönö mem teköme. Mutuk nanŋönanŋö nup membingö kapaŋ köla awöweŋgögeri, mianŋö dop mi mönö toroqeba mem teköme. Yuai ahöm enŋizawaŋö dop mönö nalukni gwötpuk alme. ¹² Mianŋö könani kewö: Naluk albingö sihimŋinan ahuba ahöza ewö, mönö yuai ahöm enŋizawaŋö dop algetka Anutunöŋ möt anŋön köli dop kölja. Yuai qahö ahöm enŋizawaŋö dop mönö qahö kewöta jim enŋimakza.

¹³ Naluk ketani algetka alaurup yeŋö malmalŋinan amqeiga nanŋini qakŋine lömböt öngömapköra qahö mötzinmö, alaurup osiba mözöröŋgözei, yembuk mendenŋa öröröŋ malbingöra mötzin.

¹⁴ Mianŋöra nalö kewöŋe yuai kelenmalelen ahöm enŋiiga tosatŋan malmalŋinanŋö yuaigöra osizei, inini mönö mi bauköm enŋigetka dopŋe akŋa. Mewö aka nanŋini könanŋep yuaigö osigetka

yeŋgö öröyuainjanan kelenmalelen ahömawi, nalö mianğoreŋ mönö i kun bauköm engime. Mewö ak anğugetka alabauk silikŋinan öröröŋ akŋa. ¹⁵ Mi Buŋa keu ki ohoget ahözawaŋgö dop akŋa, “Gwötpuk mem tokoba malgeraŋön nanŋini dop negetka numbu surukŋini qahö ahöiga boromborom mem tokoba malgeraŋön nene yuaigöra qahö osiget.” Mewö.

Neŋakurup karöbut melaim engiinga kaba bauköm engime.

¹⁶ Anutunöŋ Taitusgö uruŋi sölölöhöiga engöra ni ewö waimanjat möta bauköm engimamgö kapaŋ köla malja. Mianğöra “Anutu saiwap!” jizal. ¹⁷ Nöŋön Taitus engöreŋ kamapkö qesiba uruŋi kuŋgubiga imbiŋi melenök. Miyök qahöpmö, nanŋak iŋini bauköm engimamgö möta köpösöŋgöba nanŋi sihimŋaŋgö dop neŋgömosöta Korint engöreŋ kamamgö jiyök. ¹⁸ Neŋön urumelen alanini kun melaininga yambuk kamahot. Kianğöreŋ Ölöwak Buŋa jim sehimakzawaŋgöra i mönö urumelen könagesö dop möpöseim waŋgimakze.

¹⁹ Yangö keuŋi toroqeba kewö jimam: Masedonia urumelen könagesö yeŋön mönö i möwölöhögetka naŋgönaŋgö nalukŋi mi memba nembuk mohotŋe köna anbin. Neŋön Kembu nanŋaŋgö qetbuŋaŋan sehimapköra möta naluk ketanŋi mi ölop galöm köla Judia prowinsnöŋ anda engibin. Alabauk engibingö urukalemnini mewö aukŋe kondeljin.

²⁰ Mewö aka naŋgönaŋgö naluk ketanŋi mi tilipqilip asuhui sohobapuköra ölop galöm

köl soroköbin. Kunŋan siliknini miangöra jim neŋgibapukö möta kapan köla kinjin. ²¹ *Keu miangö könaŋi kewö: Neŋön silik Kembangö jeŋe diŋdiŋi akzawi, mi qötöŋgatpinbukö galöm mem aŋgumakzin. Miyök qahöpmö, silik ambazip jeŋine dop köljawi, mi mewöyök akingö möta kapan köljin.

²² Yetpuk urumelen alanini kun mi mewöyök melaininga kama. I nalö gwötpuk esapköm waŋgiba tandökŋi kewö ehin: Yaŋön mönö nalöŋi nalöŋi Kembangö nupŋi memangö könöpkönöp ahakza. Nalö kewöŋe iŋini tosatŋi alabauk eŋgibingö mötzei, mewö möt narim eŋgizawaŋgöra mönö eŋgöreŋ kaba bauköm eŋgimangö möta urukönöp ketanŋi ahakza.

²³ Nöŋön Taitus kewögöra möwölöhöyal: Yaŋön nöŋgö alabaukni aka nup meme neŋakni akza. Urumelen könaŋesöŋi könaŋesöŋi yeŋön alayahötnini yahöt mi möwölöhöm etkigetka jitŋememeni akzahot. Kraistkö qetbuŋaŋan mönö yetköra aka qarimakza. ²⁴ Miangöra azi karöbut mi kamei, i mönö urukalem ak eŋgiba könaŋini mewö kondelgetka ekŋe. Mewö akŋe ewö, neŋön silikŋinaŋgöra sileŋini möpöseinini, keu miangö ölŋan mönö aukŋe asuhuiga eketka urumelen könaŋesö gwötpuk yeŋön mötme. Mewö.

9

Mönö urumelen alaurupŋini bauköm eŋgime.

¹ Anutugö ambazip sarakŋi alabauk monen eŋgimegöra ohomangö mötzalmö, iŋini keu mi lök möta miangöra qahö osize. ² Iŋini alabauk

* 8:21: Qam 3.4

akingö sihimñinan ahui mötze. Nöñön mi möta engö silenini mi mianğöra Masedonia urumelen ambazip yengö jeñine möpöseiba kewö jial, “Korint aka Akaia urumelen alaurup tosatñan mönö yambu emuneyök könahiba Judia alabauk ak engibingö jöjöröba malje.” Mewö jibiga engö urukönöpñinağöra mötketka keu mianñon mönö kuñgum engiyök. Mianğöra könagesö ölni yengö uruñinan mönö amqeba alabauk akingö urukönöp aket.

³ Engö sihimñinan ahui mötzemö, töndup neñakurupni karöbut ki melaim engizal. “Korint yeñon mönö moneñ tokobingöra jöjöröba malje,” mewö jial aka keu mianğöra engö silenini möpöseial. Keu mianñon omañi aiga gwötpukñan ekepukmö, keuñinağö dop moneñ ölna algetka kahaimök tari körekñan mewö engekñegöra mötzal.

⁴ Keu mianñon omañi aiga moneñinan qahö kahaimök tari öne malgetka Masedonia neñakurup tosatñan nömbuk kaba mewö miwikñaim engibeak ewö, nöñön mönö engöra aka gamu miwikñabilenbuk. Tem kölmegö möt narim engiba malbiga ölni qahö asuhubawak ewö, inini mönö mewöñanök keuñini omañinağöra aka gamu miwikñabepuk.

⁵ Mianğöra urumelen alaurupnini karöbut mi uru kuñgum engimangö mötpi dop köli kewö jial, “Inini mönö qeljine Korint yengöreñ anda nağönağö naluk ketañi almegö keu jöhögeri, areñ mi wuatanağöba al tekömegöra mönö kuñgum engime. Mewö aketka alabauk nalukñini mi kik-kukñambuk ekbonep qakñe qahöpmö, mönö sakalakñi aka amqeba gwötpuk alme. Mi

mindirigetka zioz köwenöŋ kahaimök tari kabiga ölop membin.” Mewö jial.

Kötŋi mönö amqeba gwötpuk qesinŋa gilme.

⁶ Keu ki mönö mötmöriba malme: Nene kötŋi awamŋanök qesinŋa giljawanöŋ mönö ölni mewöyök awamŋanök mema. Nene kötŋi gwötpuk qesinŋa giljawanöŋ mönö ölni mewöyök gwötpuk mema. Miangöra gwötpuk algetka Anutunöŋ salupŋe gwötpuk engima. ⁷ Inŋini nanŋök nanŋök nalukŋini mönö uruŋinan jöhögeraŋgö dop alakŋe. Sösöŋgainöŋ amqeba mözöközöröŋ ambazip kalem engizei, Anutunöŋ mönö i jöpaköm engimakza. Miangöra nalukŋini kunŋan kuŋgum engizawaŋgöra aka uruyahöt qakŋe kude alme. Mi kik-kukŋinambuk kude alme.

⁸ Uruawam qakŋe kötönŋini gwötpuk algetka Anutunöŋ mönö köhöiba kalem möriamŋi pakpak mem sehim engimakŋa. Mewö engiiga malmal pakpak miangöreŋ yuaigöra osimei, mi pakpak mönö nalö dop buŋa qem angugetka dop köl engimakŋa. Mewö aiga nup ölopŋi könani könani mi ölop megetka ölni kelenmaleleŋ asuhuma. ⁹ *Ekbonep mosöta naluk ketaŋi ketaŋi alakzei, mi Buŋa Kimbi keu ki ohoget ahözawaŋgö dop akze,

“Yaŋön amqeba kalemŋi kalemŋi mendenŋa ambazip wanapŋi engimakza.

Ahakmemenŋi diŋdiŋi kik-kukŋi qahö mianöŋ mönö nalö teteköŋi qahö Anutugö jeŋe ahöm öŋgöma.”

¹⁰ *Anutunöŋ qesinŋ gilgil azigöra nene kötŋi waŋgiiga nene asuhui nemakzini, yaŋön mönö

* 9:9: Sum 112.9 * 9:10: Ais 55.10

nenegö mözöközöröŋ ahakŋei, mi mewöyök engimakŋa. Mi engii uruŋinan lolohoiga ölop amqeba keu kötni qesiŋ sehiba gilgetka ahakmeme solanŋaŋgö ölni asuhui Anutunöŋ mi mem qarri sehimakŋa. ¹¹ Mewö aketka Anutunöŋ mönö malmal pakpak miangören sehiba kötuetköm engiiga ölöwahakŋe. Mewö ölop amqeba ambazip nalö dop geŋmoŋi qahö kalem gwötpuk engimakŋe. Mewö aketka mi memba (Jerusalem anda) engiinga ambazip gwötpukŋan kötönŋinaŋgöra aka Anutu möpöseigetka ölni engören asuhumakŋa.

¹² Naŋgönaŋgö nup ki memakŋei, mianön mönö Anutugö ambazip sarakŋan yuaigöra mözöközöröŋ aketka bauköm engimakŋa. Miyök qahöpmö, miangöra “Anutu saiwap!” keu mi gwötpuk jimegöra aka ölni engören asuhumakŋa.

¹³ Miangö könaŋi kewö: Naŋgönaŋgö nup ki memba mewö mianön mötnariŋinaŋgö könaŋi kondelgetka ambazip gwötpukŋan mi eka Anutu tem kölmeanŋgöra möpöseim waŋgiba kewö jime, “Korint yeŋön mönö Kraistkö Ölöwak Buŋaŋi keunöhök qahö jim miwikŋaizemö, Polgö keuŋi geŋmoŋi qahö tem köla amqeba sakalakŋi aka neŋgöra aka tosatŋi pakpak yeŋgöra kalem jesöŋgö engimakze.”

¹⁴ Mewö jiba engöra köuluköba miangören waikŋini gwötpuk mem engiba kewö jime, “Ia! Anutunöŋ mönö kalem möriamŋi kelenmalelen Korint engiiga urukalemŋinaŋgö ölni gwötpuk neŋgiget.” Mewö jigetka Anutugö kalemŋan aukŋe asuhuma. ¹⁵ O nini Anutu kalemŋaŋgöra aka

möpöseimakin. Yangö kalemñi Jisös Kraistnöñ mönö qetpuk sorok akza. Nanğönağgö almeağgö keuñi mi mewö kaba teköza.

10

Polgö nupköra keu jigetka likepñi meleñök.

¹ Tosatñan engö sutñine nöngöra kewö jimakze: Mesohol köl aņguba köhöikñi tandök qahö akzapmö, kungen anda miaņgöreñ mönö keu köhöikñanök jim neņgimakza. Mewö jimakzemö, Kraistnöñ ak kömumba guņbönjönjönñi neņgimakzawi, nöñön mönö miaņgö qakñe nanak uruñini kewögöra kuņgumam:

² Tosatñi mienön neņgöra kewö tandök mötmöriba jimakze, “Pol aka yangö neņakurupñi yeñön gölmegö ahakmeme tandök wuatangöba nanñinağgöra mötmöriba ahakze.” Nöñön engöreñ kaba keu mewö jimakzei, i mönö tembul engiba awösamkakak kinda jim engimamgö mötzalmö, töndup uruñini köhöikñi kötökñi kuņguba jim engimamgö töközal. Miaņgöra inñi ambazip nöngöra keu mewö jimakzei, i mönö zilañ andö engume. Keuñini mewö mindiņgögetka eņgeki urunan mönö luai qei sutñine kaba böñjönñi malmam.

³ Ölña, ahakmemeni gölmenöñ ahakzalmö, mi töndup nanağgöra aka gölmegö ahakmeme bölöñağgö dop bim qahö qemakzal. Mewö qahöpmö, Anutugö suahö galöm aka kerökurupñi kiripo kuņgum engiba miaņgöreñ areñ sarakñi wuatangöba bim qemakzal. ⁴ Gölme ambazip uruñini walñağgö dop bimgö yuaini pakpak

miambuk bim qemakzin. Yarö azi yeñön jakömbuak ain selji selji eriba köndengetka erakzemö, Anutunöñ timbi saiwañi kukñinambuk neñgii inahöm neñgigetka mianjön mönö kerök yeñgö keu areñini pöwöwöm köhöikñi kuñguba qeapköinga erakze.

⁵ Urumelenjö kopa yeñön Anutugö könañi möt kutubepuköra aka nanñini silenini memba öngöba mötmötñini közamböta liklak ahakzemö, neñön yeñgö kiripo areñini gonjonji pakpak mi qeapköba köndenninga erakze. Ambazipnöñ keu mötmötñini bölöñi meraköba jöhömegöra köna kondel enjiinga ölop keuñini pakpak Kraist tem köl wañgimakingö dop mötmörimakñe.

⁶ Mewö mötmöriba Korint inini mutuk Kraistkö keu pakpak tem köla aposol nupni nanjögömegöra mambötzin. Inini uruñini mewö kunbuk melengetkun nini mönö qegetal ambazip yeñgö keuñini pakpak kewöta jim teköba likepñi melenj enjibingö jöjöröba maljin. Mewö.

⁷ Inini yuai pakpak mönö silegörök kude eka kewötme. Sutñine ahakmeme sohomakzawi, mianjö könañi ölni mönö mötmörime. Tosatñan sutñine ni memba et ala nanñini Kraistkö jitñememeurupñi akzeangöra uruyahöt qahö aka möt köhöize ewö, yeñön mönö toroqeba nöngöra mewöyök kewö mötmörime: Yeñön Kraistkö buñaji akzei, nöñön mönö mewöyök Kraistkö buñaya akzal.

⁸ Kembunöñ kewögöra kukösum niñgiyök: Inini mem et al enjimangöra qahöpmö, mönö uruñini möhamgöbi köhöimegöra aka maljal. Mianjöra kukösum mianjöra aiweliköba konjaen ewö sileni

memba öngöba terereibileṅak ewö, mi töndup mönö gamu kun qahö miwikṅaibileṅak. ⁹ Kimbiṅi kimbiṅi ohoba albi oyoṅda kukösumni mötketka keṅgöt mötmöt mem eṅgibileṅbuk. Miangöra keu mi nalö kewöṅe qahö toroqeba jimam. Mewö.

¹⁰ Tosatṅan keu kewö jimakze: Polnöṅ kimbiṅi miangöreṅ mönö keu lömbötṅambuk ohoba uruṅi öṅṅa kuṅgumakzapmö, sutnine kini ehinga azi löwötṅi akza aka keuṅi jii möringa qetpuk qahö akza. ¹¹ Nöṅön keu miangö likeṅṅi kewö jimam: Keuṅi omani mönö mosöta nöṅgö könanangöra kewö mötmörime: Ni kungen anda kimbinöṅ keuni köhöikṅi ohomakzali, miangö dop mönö sutṅine mala mewöyök köhöikṅanök mindiṅöm eṅgimam.

¹² Timbiqimibilim mienöṅ nanṅini jim ölöwak ak aṅgumakzemö, öṅṅa ni noṅgita aposol qetpuk akeak ewö, nöṅön mönö gamuni mötpileṅak. Mewö aiga nani aka eṅgö silikṅi likeplikep ala kewötmangö qötötangöba kölköldömdöm akileṅakmö, yeṅön mönö mötmötṅini töröpṅi wuatangöba nanṅini imbiṅinaṅgö dop uruṅi dop ala kewörakze. Ahakmemeṅiṅi mewö laṅ kewöta “Pol oṅgitzin,” jiba uruölöwak mörakze. Keu omani mewö jiba uruqahö akze. Anutugö dopnöṅ kewöt niṅgigetka ölop eṅgoṅgita maljal.

¹³ Anutunöṅ nup memegö jaböṅi al niṅgiyöhi, mi qahö oṅgita sileni gwötpuk möpöseimangöra qahö mötzal. Anutunöṅ nup meme areṅi al niṅgii memakzali, miangö dop mönö eṅgö sutṅine mewöyök nup memakzal aka miangö öṅṅangörök mönö sileni möpöseimakzal.

14 Tosatɲan keu kewö jim sohomakze, “Polnön Korint sutɲine nup meyöhanğöra silenji möpöseiiga qahö dop kölja. Anutunön gölme mesinɲa nup memapkö jabö al wanğiyöhi, Polnön mi onğita laɲlaɲ walönmakza.” Yeɲön mutuhök nup sutɲine qahö megetmö, töndup ni mem et al niɲgiba nanɲini silenini keunöhök jiba möpöseimakze. Nönön Kraistkö Ölöwak Buɲa jim sehiba anda mala mutuk Korint engören kaba urugö nup meal. Mutuk qahö kabilenak ewö, timbiqimbilim böhi mienön nöngö keuni mewö jigetka dop köli nöngön nani könananğö könanji jiba jim sohobilenak.

15 Anutunön gölme mesinɲa nup memegö jabö al enğiyöhi, yeɲön selɲini mi walönɲa engö sutɲine kaba urugö nup memakze. Nanak selni qahö walönɲa tosatɲi yeɲgö sutɲine nup mealanğöra sileni qahö möpöseimakzal. Böhi tosatɲan urugö nup memba malgeri, mianğöra mewöyök sileni qahö möpöseimakzal. Engö sutɲine mutuk nup mealanğöra mewö akiga ölop dop kölja. Anutugö arenji wuatangöba sutɲine nup memba malinga mötnaripɲinan toroqeba qariiga nanğöm nengimegöra mamböta jörömqöröm akzal.

16 Nanğöm nengigetka ölop gölmenji gölmenji Korint likepɲine Not göröken ahözei, mönö enduyangören mewöyök anda Ölöwak Buɲa jim asaribin. Nupninan mewö qariiga andöqeçe keuninan teköma. Anutunön tosatɲi yeɲgö nup meme jabönini al enğii megetka ölnji lök asuhuyöhi, mianğöra nani sileni möpöseimamğöra qahö mötzal.

17 *Mewö qahöpmö, Buña keu kiangö dop akñangö mötzal, “Kunñan silenji möpöseimangö mötzawi, yañön mönö Kembugö nupkö ölnangöra aka silenji möpöseii dop kölma.”¹⁸ Keu miangö kõnañi kewö: Nannini jim ölöwak ak angumakzeañön mönö Anutugö jeñe qahö dop köljemö, Kembunöñ niñia jim ölöwak ak wañgimawi, yañön mönö esapesapnöñ köhöiba kinma. Mewö.

11

Aposol takapulakañi yeñön tilipköm engibepuk.

¹ Nöñön borom kun uruqahö keu qakñe silememe aki miangöra mönö kude möt lömbörime. Mi töndup ni kude andö nuñguze, mötzal. ² Nöñön inñini azi mohot Kraist yañgö buñañi aketka ambi seram jömukñi sarakñi ewö engibiga yañönök engömemapkö keuñi jiba jöhöyal. Miangöra Anutunöñ uruñan engöra aka mututqutut mörakzawi, nöñön mönö miangö dop tosatñan kelök keunöñ jiba engömeget bölibepüköra waimanjat mörakzal.

³ *Kewögöra waimanjat mörakzal: Mokolenöñ isimkakalek aiga Iwnöñ (Ewanöñ) böliyöhi, miangö dop timbiqimbilim yeñön mewö me mewö jiba tilipköba engömegetka uruñinan tölöhoiga janjuñ akepuk.

⁴ Miangö kõnañi kewö: Tosatñan kaba Jisös jim asariini, mi qahöpmö, Jisös murutñi kungö kõnañi jim sehiba malgetka yeñgöra qahö mötket lömböriza. Uña Töröñi buña qem angugeri, mi qahöpmö, öme kunöñ tosatñi engö uruñine gei

* 10:17: Jer 9.24 * 11:3: Jen 3.1-5, 13

lolonqalon mala miangöra töndup könjilin qahö mötze. Ölöwak Buña möt anğön kölgeri, mi qahöpmö, keu tandökni kun qetnanök Ölöwak Buña qeta laj jigetka tosatnan mi awamnanök möt anğön kölakze. Mewö asuhumakzawangöra mönö töndup waimanjat kun qahö akze.

⁵ Miangöra waimanjat mörakzalmö, ahakmemeni mewö me mewö kewötketka etqeqeni qahö akzal. Tosatnan aposol qet memba timbiqimibilim laj ahakzei, nöñön mönö yengö nembö bapnine qahöpmahöp maljal. ⁶Keu niñgizei, miangö likepni kewö jizal: Keu ölop sorokni jijigö tandökni mi ölop qahö mötzalmö, Buña keugö könanj mönö möt soroközal. Mi mönö nalö dop pöndan aukne indelbiga möt yaköze.

⁷ Injini mem wahöt engimamgö möta nani mem et al anğuba malmalni nangömamgöra nup memba malal. Miangöra Anutugö Ölöwak Buña mi engöra söngöröni qahö jim asarim engiba malal. Mewö aka malalangöra tosatnan nöngöra uruqahö keu kewö jimakze, “Polnöñ mönö köna onğita siñgisöndok ahakza.” ⁸ Urumelen könagesö tosatne nup qahö membiga töndup naluknini öne niñgigetka membi nangöm niñgiiga injini welen qem engiba malal. Tosatnan miangöra kewö jimakze, “Polnöñ yongorö nene silik tandök ak engiba malja. Miangöra aposol qahö akzappmö, nannj nupña memakza.” Nöngöra mewö jiba jim sohomakze.

⁹ *Embuk mala yuaigöra osiba mözöröngöba miangören mönö engörenök kun qahö kunguba mem lömböriba nene yuainj qahö memba malal.

* 11:9: Fil 4.15-18

Mewö qahöpmö, urumelen alaurup Masedonia prowinsnöhök kaba yuaigöra osiali, mi ek asariba moneñ ningigetka dop kölök. Ahakmemeni pakpak miangöreñ mem lömbörim engibilenbuköra möta galöm mem anguba malal aka mewö toroqeba malmam.

¹⁰ Mem lömbörim engibilenbukö keuni miangöra mönö nani sileni memba öngöba maljal. Kunñan keuni mi Akaia prowinsñinangö gölmenji gölmenji pakpak miangöreñ qeapkömamgö osima. Kraistkö keu ölnjan mönö nam köl niñgiiga keu mewö jöhöba jiba kinjal. ¹¹ Mi wuanöngöra? Mi inñi qahö jöpaköm engibilenjak, miangöra me? Mönö ölnja jöpaköm engimakzali, mi Anutunön mötza.

¹² Aposol sesekñai ewö ahakzei, yeñön nembuk “Öröröñ akingö nup tandök miyöhök memakzin,” mewö jibingö mötze. Miangöra kewö kuñgum engimakze, “Polgö tandök ewö nup memakzinangöra mönö Pol ewö nangöm nenjime.” Nupñinangöra silenini möpöseibingö möta miangö könañi jarumakzemö, mi ölop qahö miwikñaime. Nöñön i ewö qahö akzal. Miangöra mem lömbörim engibilenbuköra mönö nani galöm mem anguba maljal aka toroqeba mewö malmam.

¹³ Yeñön aposol ölnji qahöpmö, mönö aposol takapulakañi aka nup meme ambazip isimkakalekñinambuk akze. Kraistkö aposol nenjö tandök kondel anguba nup lañ memakze. ¹⁴ Satanöñ nanñak asakñangö garata tandök ewö kondel anguba nup lañ memakza. Miangöra timbiqimibilim mienñön mewö akerangöra qahö welipkömakin.

¹⁵ Mianğöra Satangö welenqeçe ambazipurup mienön ambazip welenjini qebingö tandöktandök aka Köna keu wuatangöba mewö mianön solanji aknegöra jim sohoba kondel angumakze. Mewö nup laj memakzeangöra mönö qahö auruba welipkömakzin. Silememe mewö ahakzemö, nalö teteköñe Anutunöñ mönö likepñi ahakmemenjanangö dop melenj engima. Mewö.

Polnöñ aposol nup memba sihimbölo gwötpuk mörök.

¹⁶ Keuni kunbuk kewö jimam: Engörenök tosatñan nöñön uruqahö maljal, mewö mötmöribeak. Mewö mötmöribeak ewö, ni mönö uruqahö azigö tandök köl öröm niñgime. Mewö aketka ölop i ewö nani sileni memba öngöba sutñine malmam. ¹⁷ Awösamakak ketanji möta sileni memba öngöba keuni jizali, mi Kembugö mötmöt sihimñangö dop qahöpmö, mi uruqahö azigö tandök ewö jizal.

¹⁸ Ambazip gwötpukñan sutñine gölmegö ahakmeme bölöñi wuatangöba silenini memba öngömakzei, mianğöra nöñön mönö mewöñanök aka keuni mianğö dop jizal. ¹⁹ Nanninak “Mötmöt ambazip öngöñgöñi akzin,” jizeangöra mönö uruqahö ambazip yengöra mötketka qahö lömbörimakza.

²⁰ Ijini öl közömña kewö akze: Ambazip kewöñi yengöra mötketka uruñinan qahö lömbörimakza: Kunñan engömemba jöhöiga welenqeçeurupñi etqeqeñi akze. Kunñan tutuhum engiba nenenini nem tekömakza. Kunñan jim kelök ak enjiiga buñanji akze. Kunñan nanñi sileni memba öngöba keu töhörej jiba nuñgulumñini qekötahömakza.

21 I ewö öröm ureim ak engimangöra mönö lölöwöröni aka malal. Ösöñ ak engialangöra “Keñgöt moröya akza,” jiba nöngöra mewö mötmörize me qahö? Keu mewö jiba mianön ölop gamu qem ningimeangö dop akzal me? Keu jimami, mi mönö uruqahö azigö dop jimam. Timbiqimbilim yeñön nup memakzeangöra silenini memba öngömegöra gamuñini qahö mötze ewö, nöñön mönö mewöyök nupnangöra aka sileni memba öngömangö möt köhöimakzal.

22 Yeñön keu kewö jiba silenini memba öngömakze, “Nini Juda ambazip aka Hibru keu jimakzin.” Mewö jimakzemö, nia kun mewöyök akzal. “Israel ambazip akzin,” jimakzemö, nia kun mewöyök akzal. “Abrahamgö isi amböurupñi akzin,” jimakzemö, nia kun mewöyök akzal.

23 *Keu kun mi uruqahö azigö keu tandök ewö jimam, “Yeñön Kraistkö nupñi memakzin,” jimakzemö, nöñön mi mönö i luhut ala engongita memakzal. Nöñön mönö ambazip mi engongita nup köhöiba memba malal. Kraistkö nupköra aka kösö mire al ningigetka miangören i engongita nalö gwötpuk taral. Ihilek wahinambuknöñ mönö könöpuk könöpuk nuñguba malget. Nalöñi nalöñi lömböt miwikñaiba kömumangö dop aka malal.

24 *Juda jike galöm tosatñan jigetka arawambu kömbinöñ nuñgugetka areñi 39 aiga sihimbölöñi möta malal. Mewö ak ningigetka indimñi 5 ahök.

25 *Rom gawman yeñön jigetka ihilek wölkizknöñ nuñgugetka indimñi karöbut ahök. Sömañi mohot kötnöñ nuñgugetka kömumangöra ahal. Wançe

* 11:23: Apo 16.23 * 11:24: Dut 25.3 * 11:25: Apo 16.22; 14.19

ketanje malbiga köwet töromnöñ kuñguba qaköba jömgöiga indimñi karöbut ahök. Nalö kunöñ wanje jömgöiga köwetnöñ geba silimñi mohot aka sunjemñi kun köwet qakñe lañ malal.

²⁶ *Nalöñi nalöñi köna anda kaba malal. O töwatñi töwatñi (göwöñi göwöñi) kutuba miangöreñ lömböt miwikñaiba ayuhumamgö dop aka malal. Kegwek-kahasililij ambazip yengöra aka kömumamgö kenjötni möta malal. Juda könagesöurupni yengöra aka lömböt miwikñaiba ayuhumamgö dop aka malal. Kian kantri yengöra aka lömböt miwikñaiba ayuhumamgö dop aka malal. Taonñi taonñi miangöreñ lömböt miwikñaiba ayuhumamgö dop aka malal. Arökñañgö miriñi miriñi miangöreñ lömböt miwikñaiba ayuhumamgö dop aka malal. Köwet kutuba anda miangöreñ lömböt miwikñaiba ayuhumamgö dop aka malal. Alaurup takapulakanj yeyön nuñguget kömumbilenbuköra wösöni kot gwözöñniga malal.

²⁷ Malmalni nanjömamgöra nup köhöiba memba malal. Gaun guli gwötpuk malal. Nup gwötpuk mealangöra nenegö nalöni qahö ahöiga nenegö kömumba ogö kömumba malal. Nene qahöwahiga nalö gwötpuk bödi aka malal. Opo malukugöra osiba sanjenñi möta malal. ²⁸ Miyök pakpak qahöpmö, toroqeba kewö möta malal: Urumelen könagesöñi könagesöñi pakpak yeyön waimanjatñini jigetka urunan mönö nalö dop möt lömböriba malal.

²⁹ Mötnarip alaurup denike yeyön sörauba löwörize ewö, nöñön mönö mewöñanök i uru

* 11:26: Apo 9.23; 14.15

Törönan i waŋgiriga gölmegö kousu luhut jaböni oŋgita öngöba seŋgelau jaböni oŋgita öngöba Anutu nanŋaŋgö Suep miri uruŋe eu öngöyök. Nalö mianŋgöreŋök yambu 14 lök teköi maljin. Silebuk me silenŋi qahö uŋaŋanök öngöyöhi, mi qahö mötzal. Anutunöŋ mi mötza.

³⁻⁴ Uŋa Törönan azi mi waŋgiri Anutugö oy-aeŋkoyaen miriŋe öngöi keu qainŋi kun jigetka mörök. Gölme azi nöŋön keu mi jimangö sonŋo ahöza aka keu mi gölme ambazip neŋgö keuni-nan jibinaŋgö dop qahö. Silebuk me silenŋi qahö öngöyöhi, mi Anutunöŋ mötza. Nöŋön mi qahö mötzalmö, yaŋgö kösohotŋi mötzal.

⁵ Nöŋön azi yaŋgöreŋ yuai asuhuyöhi, mianŋgöra sileni memba öngömamaŋgö dop akzal. Nanaŋgöra mi asuhuyökmö, töndup mianŋgöra aka nani sileni qahö möpöseimakzal. Mianŋgöra qahöpmö, ösumeret akzalaŋgörök mönö mewö ahakzal.

⁶ Nanaŋgöra sileni mewöyök memba öngömamgö mötpileŋak ewö, keuni mönö keu ölnaŋgö dop jibileŋak. Mewö keu omaŋi jiji azia qahö akileŋakmö, mi kewögöra köyatim aŋgumakzal: Körek eŋön jemelenŋ mi ehalanŋgöra keu diŋdiŋi oŋgita nöŋgöra mötket öngöŋgöŋi akileŋbuk. Ahakmemeni aki eketka keu jibi mötkeri, mönö mianŋgö dowök kewöt niŋgimegöra mötzal.

⁷ Indelindel keu öngöŋgöŋi mötŋi keu tosatŋi oŋgirakzawi, mianŋgöra aiweliköm aŋgubileŋbuköra Anutunöŋ yuai jitŋambuk nöŋgö silene aliga kondi sötmangö dop nuŋgumakza. Satangö garatanöŋ sihimbölo mi niŋgiiga mörakzal. ⁸ Mianŋgöra Kem-bunöŋ mi sileneyök mem gilmapköra köuluköbiga

indimɲi karöbut ahök.

⁹ Mewö köuluköyalmö, keu kewö jii möral, “Qahö. Ösumeret aknöŋga nöŋgö kukösumnan mönö amqeba urugi kokolak qeiga aködamungabuk ahakɲan. Miangöra nöŋgö kalem möriamni mönö buɲa qem anɲunöŋga dop kölma.” Keu mi jii möta Kraistkö kukösumɲan qakne öŋgömapköra mörakzal. Miangöra ösumeret ahakzalanğöra sileni möpöseimakzal. Lömböt mi qahöwakɲapköra qahö toroqeba köulukömakzal.

¹⁰ Kraistnöŋ ni ösumeret ahakzali, nalö miangöreŋ ösum niŋgiiga köhöiba kinakzal. Miangöra ösumeret akzalanğöra tøndup mötpi dop köli siksuk qahö akzal. Tosatɲan uruqege keu töhöreŋ jim niŋgigetka mötpi dop köl niŋgiza. Kraistköra aka kahasililiŋ sesewerowero ak niŋgigetka wahöjalin möta miangöreŋ tøndup urubönjöŋ miwikɲaimakzal. Mewö.

Polnöŋ Korint yenğöra waimanjat mörök?

¹¹ Sileni memba öŋgöba mönö uruqahö tandök akzal. Diŋgimeğöra aka köna murutɲi kun qahö miwikɲaiba nöŋgöra mötket öŋgömapköra mi jizal. Ölɲa, Anutunöŋ qahö bauköm niŋgibawak ewö, nanak mönö yuai kun qahö aki andöqege keuɲinan ölɲi akawak. Ölɲi akawakmö, ahakmemeni mewö me mewö kewötzali, mönö etqegeŋi qahö akzal. Tosatɲan aposol qetpukö qet memba timbiqimbilim laŋ maljei, nöŋön mönö yenğö nembö bapɲine qahöpmahöp maljal.

¹² Engö sutɲine nup memba lömböt gwötpuk möta mökösoŋda malali, miangöreŋ Anutugö kukösumɲan sölölohöm niŋgiiga anğöletot aiwesök

könaŋi könaŋi asuhuget. Ahakmeme mianŋön mönö aposol akzalaŋgö könaŋi kondel enŋiiga eket.

¹³ Injini bauköm enŋial aka urumelenŋ könagesö tosatŋi mi embuk örörönŋ ak enŋial. Tosatŋi enŋömembu wahötkeka injini mönö denöwö enŋömosötpi öne malbeak? Ölja, naŋgöm niŋgimegö lömbötŋi mi enŋö qakŋine qahö alal. Aposol takapulakaŋi yeŋön lömböt mi enŋö qakŋine alakzemö, nöŋön mi tosatŋi yeŋö qakŋine albi bisimakze. Naŋgöm niŋgimegöra qahö kuŋgum enŋiba mewö köpösihit ak enŋial me? Mianŋöra “Polnöŋ köpösihit azia akza,” jibeak, mönö pinjitni mi mosötmegöra qesim enŋizal.

¹⁴ Mötke, nalö kewöŋe kunbuk enŋörenŋ kamangö jöjöröbiga indimŋi karöbut akŋa. Kaba nupni naŋgömegö lömbötŋi mi dumŋe kunbuk enŋö qakŋine qahö almal. Mi qahö. Nanŋini sukinapŋinangöra qahö köpösönŋömakzalmö, nanŋinak mönö nöŋgöra ak enŋimapköra mötzal. Nahönbörat yeŋön iwinamurupŋini naŋgöba inap tokoba enŋimeanŋö dop qahö akzemö, iwinam yeŋön mönö mi nahönböraturupŋini yeŋgöra tokogetka dop kölja. Mianŋö dop urugö nupnöŋ göröken nöŋön iwiŋini akzal. Mianŋöra urunöŋ göröken bauköm enŋimamgö mötzal.

¹⁵ Mianŋöra enŋön ölöwakŋegöra yuaini pakpak mi sösongai qakŋe tököm enŋibi enŋö buŋa akŋapaköra mötzal. Nani malmalni mewöŋanök ölöwakŋegöra mosötmamgö mötzal. Mewö önöŋi qahö jöpaköm enŋibi urukalemnan qarimakzapmö, enŋö urukalemŋinan mönö töndup wuanöŋgöra wazimakza?

16 Ölña, nangöm ningimegö lömbötñi mi engö qakñine qahö alal. Nöngö tuarenjonurupnan keu miangöra urumohot akzemö, tosatñan kewö jibeak, “Pol mi mötmöt azia aka tilipqilipñambuk uruñini mezañda köpeim engiba monenini mewö me mewö örömakza.” Keu mianñon ölnji qahö. 17 Mi denöwögöra jize? Neñakurupni melaim engibiga engören kageri, yengörenök kunñan Pol inap wañgimegöra kuñgum engiyök me qahö? Qahö. 18 Taitus engören kamapkö kuñgum wañgiba urumelen ala kun yambuk melaibi kayohot. Taitusnöñ ni inap ningimegö kuñgum engiyök me qahö? Qahö. Uña mohot mianñon mönö solölöhöm netkiiga nup nangönanñögö köna mohot anda kaba malit. Mewö.

Polnöñ mönö Anutugö kukösum qakñe kama.

19 Kimbi ki oyoñda miangören nöngöra kewö mötmöribepuk, “Keu jim engiinga miangö likepña kapañ köla jiba mewö ohoza.” O wölböt alaurupni, miangöra kewö jimam: Mönö Kraistpuk qekötahöba keuni Anutugö jemesoholñe jiba ohoyal. Nupnini pakpak mi enñon uruñini möhamgöba köhököhöi miwikñaimegöra memakzin.

20 Engören kaba eki ahakmemenini tökömakzali, mi wuatangöba malbepuk. Mewö miwikñaim engibilenbuköra waimanjat mötzal. Ahakmemeninangö likepñi meñengibi qakñine öngömawi, enñon mönö tandök akñami, mi tökömegöra mötzal. Sutñine ahakmeme kewö akepuköra goro mötzal: Urunöñ mututqutut aka anñgururuk akepuk. Urusingok aka yom jibepuk.

Silenöŋ alal ak aŋguba deŋda nanŋini kambugörök mötmöröiba malbepuk. Andöqeŋe keu töhöreŋ jiba mianŋön mem bölim aŋgubepuk. Tosatŋi yeŋgö keuŋini tölapŋe jigetka diwonŋdawoŋ anŋapuk. Jakbak-öraŋböraŋ aka areŋi törörök qahö wuatangöba nanŋini imbi-imbi laŋ malbepuk.

²¹ Mewö aka malme ewö, nöŋön mönö kewö asuhumapköra waimanŋat möta kamam: Ambazip gwötpukŋan mutuk siŋgisöndok aka malgeri, yeŋgöra mönö urukömbuk aka sahötpileŋbuk. Ahakmeme töwötŋambuk laŋ wuatangöba sihimŋini kömbönaŋi miwikŋaimegöra serowilin akerangöra gamu qahö möta qahö möt bölim aŋguget. Sutŋine kabiga uruŋini kunbuk qahö melenŋet enŋekiga Anutunöŋ mönö uruni kuŋgui kunbuk urueret akileŋbuk. Mewö.

13

Galöm meme keu qöndökŋi

¹ *Nalö kewöŋe enŋöreŋ kabiga indimŋi karöbut akŋa. “Keugö jakeŋe alalgö keuŋi pakpak mi mönö ambazip yahöt me karöbutŋan nanŋöba jigetka köhöimakza.” ² Nöŋön Buŋa keu mianŋö dop akzal. Enŋö sutŋine malbi indimŋi yahöt aiga mianŋöreŋ lök galöm meme keu enŋial. Keu mi nalö kewöŋe kunbuk köl guliba qeljiŋeyök jizali, mianŋön teköza. Mianŋöra kunbuk kamami, nalö mianŋöreŋ ambazip siŋgisöndok mutuk akeri me akzei, mi mönö qahö enŋehorimam. Bölöŋamŋinambuk iŋini mönö körek mindiŋgöm enŋimam.

* 13:1: Dut 17.6; 19.15

³ Kraistnönj mönö ösumeret qakņe qahö ak enjimakzapmö, kukösumņi sutņine kondelakza. Kraist mianjönök mönö sölölöhöm ninggiiga aposol aka keu jimakzali, injini miangö kōnaņangöra uruyahöt aka kapan kōla qesim angumakze. Miangöra silikņinaņgö dop mönö keu enjiba mindiņgöm enjimam.

⁴ Kraist maripomnönj qegetka kömuyöhi, nalö miangörenj mönö ösumeret tandök malökmö, tōndup Anutugö kukösumņan nam köl waņgiiga mal köhöiza. Nōņön mewōņanök yambuk qekōtahōba nani ösumeret aka maljalmö, Anutugö kukösumņan mönö nam köl ninggiiga Kraistkö jitņi memba mindiņgöm enjimangö mal köhöizal.

Mönö nanņini kewöt anguba uruņini melenjme.

⁵ Mönö nanņini törörök kewöt angume. Uruņini melenja öļņa Kraist möt narize me qahö, miangöra mönö esapesapnönj ala kewöt angume. Kraist Jisösgö Uņaņan uruņine mal köhöizawi, mi möt kutuze me qahö? Uruņine qahö malja ewö, injini mönö esapesap miangörenj et enjuiga Kraistkö buņaya qahö akze. ⁶ Nōņön enjörenj aposol öļņi akzal me qahö, injini mewö kewöt ningigetka esapesap miangörenj kude eta nuņguma, mewö mötzal. Injini nōņgö kōnani mewö aukņe eka möt kutumegöra jörömqöröm aka maljal. Miangöra mindiņgöm enjibi öļņa dop kölma.

⁷ Keu pakpak ohoba kotzali, mi ak sohobepukōra Anutu köuluközin. Keu kun jim sohoba malgetka kaba mindiņgöm enjibiga tuarenjonurupnan mönö aposol kukösumni öļņa eka ek asarime. Mewö asuhumapkōra qahö

köuluközal. Inini qahö mindingöm engimamangö dop nekepuköra qahö köuluközalmö, enön urumelen diɗɗi akɛgöra köuluközal. Uruɗini ölɗa melenme ewö, nöɗön mönö qahö mindingöm engibi tuarenjoɗurupnan nöɗgöra toroqeba azi lölöwöröɗi tandök ewö mötpeakmö, mi muat.

⁸ Nini keu ölɗi qetala kun uteköbingö osibinmö, keu ölɗan sehimapköra ölop kinbin. ⁹ Nöɗön kukösumni qahö kondela ösumeret tandök malbiga enön köhöiba kinmei, nalö mewöɗe mönö sösongai ahakin. Urumelenbö aködamunɗini körek miwikɗaiba köhöiba kinmegöra neɗön Anutu köulukömakzin. ¹⁰ Kembunöɗ inini memba et al engimamgöra qahöpmö, uruɗini möhamgöbi köhöimegöra möta kukösumɗi mi al niɗgiyök. Kukösum miangö qakɗe kinda engöreɗ kamami, nalö miangöreɗ könöpuk ak engibileɗbuköra mönö keu ki köröwen mala engöra kimbi ohozal. Nanɗinak mindingöm aɗgume ewö, mönö ösöɗ ak engimam. Mewö.

Yaizökök keu teteköɗi

¹¹ O urumelen alaurupni, keuni jim teköba qambaɗ kewö engizal: Mönö söngai malme. Könaɗamɗini sohoyöhi, mi mönö körek mindingöm teköme. Urukunɗukunɗu keu engizali, mi mönö buɗa qem aɗguba tem kölme. Keu jiali, miangöreɗ mönö urumohot aka luainöɗ malme. Mewö aketka Anutu jöpaköm aɗgumegöra inahöm neɗgiba luai qem neɗgimawi, yaɗön mönö embuk malma.

¹² Inini urumelen alaurupɗini yembuk jölöɗini jiba mönö köna sarakɗi wuatangöba jölöɗini jiba aɗgum aɗguba numbuɗini yöhötim namba malme.

Anutugö ambazip sarakñi pakpak ki maljei, yeñön yaizözköknini algetka engörej kaza.

¹³⁻¹⁴ Kembu Jisös Kraistnöñ mönö kalem möriamñi engiiga Anutugö urujöpakñan nam köl engiiga Uña Töröñan körek inahöm engiiga urumohot aka köisirik malme. Mewö.

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 3 Mar 2023 from source files dated 9 Oct 2020

c0871260-68cc-5a50-953f-52200e105d1e